

四庫全書

集部

欽定四庫全書

集部

可閒老人集卷三

詳校官中書_臣孫衡

中書_臣劉源溥覆勘

總校官進士_臣朱鈐

校對官編修_臣錢世錫

謄錄監生_臣康傑

欽定四庫全書

可閑老人集卷三

明 張昱 撰

七言律詩

投贈潞國公承旨學士張仲舉

漢家舊德有桓榮
赤舄登朝羽翼成
三晉鳳鳴千載會
兩河龍現五雲迎
獨於社稷多難日
復使君臣大義明
自念昔曾親几杖
頌聲慚後魯諸生

投上中書右丞相托克托

履舄從容自九重相王忠孝更誰同
千年帶礪猶初誓萬國臣鄰盡下風
星貫紫垣朝佩劍月臨黃道夜傳弓

漢家若論安劉策四皓難書第一功

五府驛代楊左丞留題

後有楊維禎次韻

免胄日趨丞相府解鞍夜宿五侯家
玉盃行酒聽春雨銀燭照人如晚霞
受命敢忘軍旅事撫時又過掖垣花
漢家未可輕韓信尚要生擒李左車

束髮從戎十五年戰回平地血成川英雄生世有如此
忠孝報君當慨然倣擾弄兵俱赤子中興有道自皇天
猖狂暫假姑蘓息繫頸終須拜馬前

湖山堂宴贈天使還京

畫旗風裏繡筵開竟日歌鐘樂未回柳拂玉鞍秋繫馬
酒淹羅袖醉傳杯杭城近自月前復使者適從天上來
歸對大廷真得實眼中諸將盡奇才

岳鄂王墳上作

朔雪炎風共此年中原父老亦堪憐
豎儒屢遣祈求使大將空持殺伐權
忠誼有碑書大節奸邪無面見重泉
至今宰木猶南拱遺憾西陵是墓田

陪宴相府得芍藥花有賦

醉吐車茵愧不才馬前蝴蝶趁花回
玉瓶盛露扶春起錦帳圍燈照夜開
垂白敢思溱洧贈歌紅還是廟廊栽
揚州何遜空才思惟對高寒詠閣梅

退居湖上投贈楊左丞四首

樓外湖光白渺茫樓中少婦試新妝行年將近半百歲
大醉豈能千萬場織錦繡裙飛蛺蝶白描歌扇睡鴛鴦
垂楊滿院無人到芍藥花開日正長

信馬蘓公堤上行水邊鷗鷺不曾驚春波滿眼湖光細
花片飛來雨點輕天上碧雲如有詠樓中紅袖謾多情
牧之老去狂心歇總把風流付後生

宿酒猶多睡未忺好風何處散香奩可教春日閒瑤瑟
而使楊花撲繡簾削跡不煩三顧重息機將廢六壬占

今朝畫省無公事又得從容少避嫌

且觀神女為行雨莫問郎官應列星芳草到門無俗駕
好山終日在湖亭白鷗共戲荷葉小黃鳥亂啼楊柳青
肯信曲闌干外立晚涼吹得酒初醒

宴犒將士酒酣命健兒舞劍為樂浙省平章泣下
不禁感事有賦

平陸龍蛇起殺機旄頭又自照金微兩階干羽知何似
二典君臣豈盡非劍舞樽前迴夜電燭明帳下接晨輝

可憐司馬江州淚濕盡團花舊戰衣

陪宴後堂觀牡丹回有作

風光偏惱掖垣人銀甕連車載酒頻寒食新烟萬家樹
洛陽花擅一年春揀好任從天女散近前不嫌丞相嗔
壓帽紅香歸路晚幾多瞻望馬前塵

至普陀洛伽山寺作佛事七晝夜祈見海岸觀世
音及善財巖七日之間隨心應現大衆瞻仰無不
慶讚

丞相函香致此誠願深海水救羣生慈悲謂可消諸惡
征伐容將息大兵金色圓光開寶髻玉毫妙相絡珠璣
手中示現楊枝露願洗干戈作太平

戊戌題

海上作

華表仙人舊姓丁羽毛今日惜飄零海中又見蓬萊淺
門外空傳楊柳青暮雨朝雲翻覆手落花飛絮短長亭
如何未熟黃梁飯說道英雄夢已醒

楊忠愍公墓上作

夢覺邯鄲萬有空邦人猶自說英雄道家論將忌三世
臣子報君惟一忠淺土何堪封馬鬣迷魂猶自恨秋風
死綏固是將軍事國史旂常畫雋功

惆悵

交游蚤歲在幽燕費用黃金買少年闕下朝回瞻馬首
酒間俊發抱龍泉劇談寧顧日西落倒載不知天左
旋惆悵近來纔解事先生五柳種門前

三山夢斷綵雲空幾把長牋賦惱公畫閣小杯鸚鵡綵

玉盤纖手荔枝紅春衫汗裏薔薇露夜帳香回茉莉風
惆悵近來江海上却將鞍馬學從戎

畫船湖上載春行日日花香扇底生蘓小樓前看洗馬
水仙祠畔坐聞鶯碧桃紅杏渾相識紫燕黃蜂俱有情
惆悵繁華成逝水盡歸江海作潮聲

惆悵當年使酒來娼樓紅粉夜相催可憐明月二分在
不見瓊花半朶開誰復醉翁堂下柳更堪從事閣中梅
揚州一片青青草誰信春來無雁回

惆悵雄藩海上游武昌佳氣接神州東風歸思王孫草
北渚愁生帝子洲楚國江山真可惜劉家豚犬亦何羞
不須更問中原事官柳新栽過戟樓

至今惆悵在東城結伴看花取次行輦道駐車招飲妓
宮牆回馬聽流鶯星河織女從離別海水蓬萊見淺清
不有酒船三萬斛此生懷抱向誰傾

過楊忠愍公軍府留題

總是田家門下客誰於軍府若為情林花滿樹鶯都散

雨水平池草自生街上相逢驚故吏馬前迎拜泣殘兵
能言樓上題詩處猶有將軍舊姓名

睡覺

滿院楊花風力輕牡丹時節好清明簾垂不知白日晚
睡覺忽聞黃鳥鳴萬斛春光金盞酒百年心事玉人筭
劉伶未到忘形處枉自閒將畚鍤行

湖亭納涼

奈爾湖光月色何不知此境為誰多忽驚墜露翻荷葉

想見微風生水波
炎景只消清夜飲
老懷都付小鬟歌
家中未必涼如此
且待樓西轉絳河

燈前有賦

雨夜湖樓錦帳垂
有人為爾故眠遲
春衫照影看歌舞
寶合薰烟學畫眉
何處絕纓憐楚客
為誰掩袂泣樊姬
思量暗室無窮事
留到天明不忍欺

湖舫勸曹德昭僉院酒

倩得名姬唱慢歌
梁塵直欲下輕波
西風八月芰荷老

落日滿湖鳬雁多到手莫辭雙盞飲轉頭又是一年過
光陰只在槐柯上奈此浮生樂事何

宿中書左司呈上太尉丞相

天上誰開白玉堂東垣列宿共輝光畫屏雪映蓬山雀
錦帳雲凝漢署香嚴尹世交憐杜老揚州詩興屬何郎
連雲騎省乘風露月過秋河夜色涼

別春次揚州成廷珪韻

燕語鶯啼盡可哀更無馬跡到青苔自從玉樹成歌後

曾見銅仙下淚來為晉為秦花幾度行雲行雨日千迴
若教蝴蝶知春夢儘把黃金付酒盃

省垣梅花

官梅過臘花開遍何遜揚州興未闌疎映粉闌疑是畫
香飄羅袖欲生寒公餘不厭巡檐笑夜後還思把酒看
只恐明朝零落盡枉教人恨角聲殘

安慶南城寄賀守帥余廷心郡守韓公懋余家留
是郡故句中及之

壯哉淮邑冠荆舒新築堅城鐵不如完美皆吾大夫力
莫安與爾庶民居歸心江漢朝宗水滯跡周南太史書
莫說髣毛成種種近來吾亦愛吾廬

丞相委入姑蘓索各官俸米留別幕府諸公

不比常年載酒遊杏花時節出杭州粉闌未覺為郎貴
萱草難忘此日憂沙漠帛書空見雁江湖春水莫容鷗
何時折盡垂楊柳留取他年繫別愁

至姑蘓呈太尉

相君求米若求雨員外得船如得仙職忝下僚班可耻
情通鄰好亦堪憐山中棋局迷樵客溪上桃花誤釣船
醉把玉盃無所計不勝惆悵晚春前

城南武威樓成守帥余廷心自安慶使人索詩

自來名將出名儒暫駐檐帷向上居城統朱闌連百雉
門排畫戟壯羣烏雲開五老招何及秋對五峰清有餘
樓上記成鐫琬琰廬陵須得蔡襄書

辭荅張太尉見招

中年頻覺壯心去涉世頗知前事非若使范增能少用
肯教劉表失相依風雲天上渾無定麟鳳人間不受讎
殘夢已隨舟楫遠五湖春水一鷗飛

秋興

一夜涼風便覺秋楚人多感易生愁金盤露水何曾見
紈扇恩情未肯休零落梧桐金井上稀疏楊柳御街頭
近來收得麻姑信說道蓬萊更可憂

夜登天童寺觀海日

登臨何事獨關情
北斗闌干對面橫
漢使猶空河畔影
霓裳如在月中聲
魚龍水濶星辰動
鴻雁風高鈴鐸鳴
不待下方雞唱罷
衲僧東指海雲平

桃花園招烏雅廡訪使飲

桃花好是未全開
人世花開醉幾回
一片嬌隨歌扇去
滿園紅待使君來
尊疊有興皆清事
風雨明朝又綠苔
誰見朔兒千歲實
銜巾青鳥莫相猜

武夷山

南郡名山說武夷幔亭尚想是秦時空中簫管何曾絕
洞裏曾孫自不知石室尚遺仙蛻骨棹歌猶唱宋人辭
山前毛竹如龍籜笑與壺公作杖騎

冷泉亭觀猿

舊從巫峽看猿挂此日山中復見之點與樵蕪爭墮果
捷於風雨下高枝月沉夜澗魂先斷風攪霜空叫轉悲
應記往年梅嶺事玉環付與老僧持

觀潮次貝廷琚韻

世代銷沉在此聲幾回東下復西傾翻騰日月迷朝夕
簸蕩魚龍定死生銜石每憐精衛小投醪未見濁河清
眼前波浪猶如此莫說蓬山頂上行

題後堂壁

兵權去手志何伸恥是隨班入省頻京國蹉跎空在夢
蓬萊清淺已生塵統朝謾贈秦人策孔子將書魯國麟
散騎得辭丞相後五湖安往不閒人

春閨詞

白日高堂欲暮難鳴鳩乳燕靜相干銀瓶行酒雙鬟綵
玉管調笙十指寒蝴蝶每因飛處見牡丹多是折來看
明朝為遣安西使錦字紅燈織夜闌

春懷

幾浣先生漉酒巾眼中猶是落花頻春來祇與醉為伴
睡起翻疑夢是真翠羽棲香秦隴烏玉釵墜髻洛陽人
風光已逐流年去此事那容更問津

湖上謾興

百鎰黃金一笑輕少年買得是狂名樽中酒釀湖波綠
席上人歌鳳語清蛺蝶畫羅宮樣扇珊瑚小柱教坊箏
南朝舊俗憐輕薄每到花時別有情

爛漫風光在酒家狂蜂冶蝶趁繁華人來人往如趨市
樓上樓前盡屬花波面畫船雙蕩槳堤邊黃犢小游車
目成眉語知何限消盡柔魂在狹斜

湖上新泥雪漸融門前溝水暗相通裙欺萱草輕盈綠
粉學櫻桃淺淡紅暮雨欲來銀燭上春寒猶在酒樽空

青綾被薄不成夢又是一番花信風

樂事杭州奈爾何人間富貴易消磨畫船湖水年年在
紅粉娼樓處處多歌引行雲來綺席舞翻迴雪下春波
東坡往日留詩後更有何人載酒過

聞鶯

風花時節又清明迸淚何緣聽曉鶯咫尺故鄉天近遠
幾家春草路縱橫英雄轉眼俱為鬼造物於人豈絕情
自是晚生堯舜世不關天地不昇平

同趙郎竹園夜飲

塵土無由得見侵
粉牆高護碧雲深
日行南陸暑不到
月度天河龍自吟
沉飲何妨同阮籍
幽情亦或過山陰
夜涼庭院羅衣薄
吹徹參差思不禁

游雲門寺同寶林別峰尊師賦

東游好是雲門寺
況在若耶溪水邊
茶會詩傳唐舊刻
松壇名重晉諸賢
行雲欲傍支郎馬
垂柳能維賀老船
也當一場風月夢
為題名姓法堂前

凝香閣聽雪

陡然寒重紫貂輕便覺高檐瓦有聲
欹枕欲同蟬殼蛻
開門唯恐鶴巢傾
數杯酒力春容轉
滿盞茶香夜思清
小玉近牀推不醒
袖籠檀板失天明

桐栢宮留題

甚慕天台馬子微
後千年始到幽棲
江湖歲月憐新夢
泉石烟霞感舊題
阿母信傳青鳥後
玉笙人遠絳河低
當時不盡風流興
付與山鶯盡日啼

繡毬花次烏雅廉使韻

繡毬春晚欲生寒，滿樹玲瓏雪未乾。
落遍楊花渾不覺，飛來蝴蝶忽成團。
釵頭懶帶應嫌重，手裏閒拋却好看。
天女夜涼乘月到，羽輪偷駐碧闌干。

竹居為張行中題

南渡循王之子孫，文采風流今獨存。
既有綠筠為別業，何須畫戟在高門。
小堂翡翠橫釵影，曲徑莓苔散屐痕。
侍婢牽蘿相補葺，幾回風雨送黃昏。

菊隱齋為金子才賦

時菊家園作隱淪要於晚節伴閒身從來東晉多名士
豈獨南陽有老人色綻黃華知應候香浮綠酒可過旬
蘓耽橘井桐君錄從古良醫盡逸民

初月

薄暮蛾眉臨水出照人猶自未分明初升遠岫如無意
欲下西樓却有情離別幾多長在望團圓三五未能成
豈知少婦堦前拜羅袖纔揜恨已盈

湖樓

樓前芳樹碧盈盈付與幽禽自在鳴堤上馬馱紅粉過
湖中人載畫船行日長燕子語偏好風暖楊花體更輕
何限才情被花惱獨教書記得狂名

碧梧軒為賈彥仁彥德二貢士賦

賈家種玉能成樹上有結巢雙鳳凰陰連深井暮雲碧
花落大樽春酒香孔雀羽毛歌扇小石榴顏色舞裙長
莫教擊墜軒前綠留與吹笙共晚涼

東堂梨花

為爾東堂雪滿株花時長是憶吾廬
風前恐化莊周蝶月下還迷衛玠車
老至逢春成感慨興來把酒為躊躇
尋常一樣清明節說似當年總不如

問月亭

何事流年逐逝波試將此意問姮娥
到頭白髮幾人在愛此清光今夜多
直欲仰空援北斗便須儘量酌天河
此懷此處不傾倒禁得宋郎秋思何

題清心堂詩卷後為相院判賦

曾把桐鄉作故鄉
衙回繫馬入斯堂
竇家五子榮丹桂
謝氏諸郎焚紫囊
乞得異花曾見種
釀成名酒許先嘗
潛然掩卷垂殘淚
不獨題詩媿老蒼

贈謝肅東還

風塵如此送君行
莫惜離觴與再傾
執手且聽楊柳曲
過江便是越州城
龍駒墮地即千里
鳳鳥及時纔一鳴
年少有才終大用
賈生曾擅洛陽名

春暉堂為謝肅題

謝傅風流在越鄉至今文彩見諸郎百年喬木慈烏聚
幾日東風萱草長江上鯉魚朝入饌枕前紈扇晚生涼
詩成便欲煩青鳥銜致君家白玉堂

次林叔大都事韻

春來長是誤佳期鵲鳥雄鳴不可私錯認櫻桃懸蟠子
悔將衫袖染鵝兒燒殘蠟燭渾成淚折斷蓮莖却是絲
辜負綵窓閒歲月只教楊柳妬腰肢

何處銀鞍白鼻騮
忘將錦瑟數年華
渡頭水急憐桃葉
陌上春狂信柳花
那得芳心對鸚鵡
泣將殘淚付琵琶
一身已自成惆悵
況是平陽十萬家

莫謾題情在粉牆
藕絲終日繫柔腸
不知漢主黃金屋
何似盧家白玉堂
好夢自拋桃葉後
閒愁似過柳條長
無端收得番羅帕
徹夜薔薇露水香

陳王當日賦凌波
寫得風流也太多
掌上玉鸞看教舞
雲中青鳥使傳歌
情緘尺素魚中字
恨織迴文錦上梭

休信雙星是牛女年年波浪隔天河

白菊

雪羽翬然欲滿叢秋香吹遍畫闌東
今宵白露今宵月昨夜清霜昨夜風
朝濯尚於青蕊見夕餐將與素霞同
數莖白髮閒相對誰識柴桑時芋翁

驚秋

城上高風散鼓鼙樓頭獨客不勝悲
老嬰世故嗟流落病念鄉關厭別離
仰面絳霄猶昨日驚心黃葉又當時

所悲騎省空名累不是潘郎愛賦詩

昔游

春到名園總是花都城無處不繁華冠翹鵲尾朱袍盛
馬頰金羈玉面斜騎吏去忙官索酒侯門散晚妓留車
党家賤妾粗豪慣輕易銀瓶雪水茶

小王孫

貂帽貂裘美少年圓牌通籍內門前新分草地緣游獵
舊賜彤弓未控弦銀甕蒲萄春共載玉鞍驕馬日隨牽

穹廬一夜迷深雪忘却朝天是醉眠

漢未央宮榱題硯

雕牆峻宇幾浮雲金石雖堅亦鮮存秦宮三月已灰燼
漢瓦千年猶隸文改用尚能為硯器得名何異在君門
咸陽土盡英雄骨誰是榱題記主恩

匏瓜道人為徐子貞賦

吾豈匏瓜繫此生道人玩世以為名百年雨露司榮悴
一日江湖見老成蘊落情懷莊子瓠浮沉踪跡楚王萍

壺公借與龍為杖，拚着青鞋到處行。

秋聲

自從大火西流後，漸覺涼風到竹林。
李白已無當世志，宋郎又動少年心。
羣陰得勢夜聲合，萬物將窮殺氣沉。
謾索雅琴彈一曲，徽絃統指是商音。

七夕

天上何因有別離，人間謾自指佳期。
果如女嫁男婚事，何限風清月白時。
銀漢幾曾橫鵲影，花盤空復罥蛛絲。

今朝少婦心中事只有迴文錦字知

寄淮安夏掖齋

為感風花懶出門每於時事鮮知聞江湖信遠春空雁
僚佐情深日暮雲詩句好於何水部官資高過杜司勳
海波不隔淮揚路遙指蓬萊憶使君

有餘清堂

連雲騎省與之鄰可是高堂履舄頻湖水過雲天似玉
山風吹酒月留人紅綃貼肉扶歌板翠羽妝頭出舞茵

禮法豈為吾輩設直須樂死百年身

東示二姪女

連宵骨肉夢相牽二女洪都有信傳聞說長成渾屋喜
寄來針線得人憐阿婆近日身差健老嫗經年病未痊
爾叔治兵淮水上使回懷抱覺淒然

寄內臺侍御史韓克莊

雜花猶記雨諸天共禮旃檀古佛前塔院施僧猶昨日
齋房聽雨憶當年抄書不許支官紙買酒從教用俸錢

老盡尚書舊賓客至今慚愧杜樊川

夜泊牛渚磯同韓克莊僉事李五峰先輩登蛾眉

亭

牛渚磯頭青雀舫蛾眉亭上紫鸞笙月中只可賦秋興
酒後不宜留步兵萬里長河何處盡百年遺恨此中生
水波總是英雄淚剗却青山氣未平

浙省感恩榮言懷述事

仰拜宣黃萃一門更煩使者枉南轅寵榮已過愚民分

存沒俱蒙聖主恩列爵稱男分五等封君有縣亦通尊
區區戎馬驅馳後日月餘光照覆盆

明皇妃子擊丸圖

畫柱相當馳道開黃旗風裡試龍媒天迴日馭戎衣起
電繞星樞綵捧供奉嬪嬙皆令色近前便佞是于思
九齡猶是開元日何事都無諫疏來

重過育王寺明月堂同照大千尊師賦

又攜二客過斯堂慚愧當年塔院香染習未除塵土念

奔馳猶作馬牛忙
漸添白髮頭顱上
轉覺青雲道路長
儘醉堂前舊時月
莫將閒話及齊梁

贈士人軍中售筆

古來文字用鉛槧
筆至蒙恬始得名
每日諸軍傳檄到
何人橫槩賦詩成
管裁鳴鳳巢邊節
毫運饑蚕葉上聲
莫鄙毛錐無所用
要知韓范盡書生

廬都事海道失風自丹羅至浙右還閩省

指南針下失風帆
雪浪連天不見山
惟爾不懷和氏璧

彼蒼竟賜大夫環皇天未厭生戎馬國步何能斷阻難
此去驛程三百里海棠花底度閩關

侍御周伯溫以行臺羈留姑蘓柬寄之

白頭歲月付流波何物虛名在諫坡屬國莫嫌持節久
子陽猶謂見天多強梁不見圖銷印跋扈如聞欲倒戈
一樹紅梨春事晚宣文閣下欲如何

殘牡丹

繞闌莫惜酒行頻開到姚黃已暮春瓊樹今朝歌正好

彩雲昨夜夢非真園林雖不異前日車馬可憐非舊人
欲倩東風問蝴蝶花前誰是百年身

贈吳世顯宣使代張氏捧謝表請命朝廷寄仲舉
此去風波萬里長使人指日覲清光雲開雉尾當霄漢
龍抱金函出表章羌服從來尊正朔包茅次第貢明堂
浯溪有石高千丈謾叟重煩頌大唐

題御史孟昉野服畫像

好似當年賀季真乞身歸老鏡湖春銅章不綰御史印

練布能裁處士衣
麟閣雲臺千載後
鳥啼花落幾回新
浮雲過眼尋常事
且作齊東一野人

王自牧冷起敬諸文士遊西湖南山記題其後

近聞甚得湖山樂
惜不與之同一遊
莫問石城來艇子
却思簫管在揚州
枕邊蝴蝶高樓夢
扇底芙蓉小院秋
今覺司勳非往日
酒間無復舊風流

得朱垣編修海道之音

命酒徵歌記往年
玉堂遂有夢相牽
魚臠尺素雖云密

事載空言始可憐
李世人材思管樂
盛時戎馬說幽燕
張騫慣識天河路
俯仰乾坤一慨然

高房山畫廬山圖
貢雲林待制有詩
在上為其子
戶部尚書貢師泰
賦蓋其家物也

萬壑匡廬紙滿張
好詩好畫兩相當
十年物色偶然得
二老風流何可忘
還見虹光生靜夜
却驚雲氣濕高堂
尚書座上多遊客
獨有張翰憶故鄉

謝左丞自軍中至
同宴周德新員外
別業

坐來清聽滿風前
頓覺煩襟為灑然
馬上功名真是夢
杯中歲月莫非仙
浮雲對嶺張圖畫
鳴鳥藏花雜管絃
莫訝周郎賓客盛
雄資英發正當年

兩山亭留題

馬頭曾為使君回
北望新亭道路開
於越地形緣海盡
勾吳山色過江來
英雄有恨餘湖水
天地忘懷入酒杯
珍重謝家林下客
玉山何待倩人催

三月三日湖上作

此日誰人肯在家傾城滿意事繁華時非上巳不為節
春到牡丹纔是花霧鬢風鬟湖上女畫輪繡轂道傍車
兒童儘唱銅鞮曲未覺人間日易斜

此日西湖似曲江湔裙流水碧淙淙誰家婦女不紅粉
是處水亭皆綠窓白髮看花春可數畫船扶醉玉成雙
邦人何哂狂居士老至關情尚未降

汴河懷古

家國承平厭萬機輕乘黃屋出京畿三年巡狩前王有

千里看花亘古稀
河畔柳條春自長
苑中螢火夜還飛
當時九廟躬辭日
肯信龍舟更不歸

涵虛閣

靈巖寺舊
為館娃宮

靈巖寺是館娃宮
霸國風流夢已空
楚客智窮第三諫
後越師戍合五湖中
佳人已化朝雲白
高閣猶涵夕照紅
誰料後千年過此
却憑闌檻數飛鴻

叢玉軒在淨慈寺
方丈後有鹽運使
李員嶠畫墨竹一
林儒學提舉趙松
雪題名叢玉參政
姚江翁

作記憲副鄧善之書版刻在楣間

河東使君竹成癖落墨滿林烟雨新雪壁自期留後日
碧紗誰與護輕塵百年聚散同殘夢一代風流不數人
賴是主僧知敬客不辭騎馬來頻

遊天台山回別省院諸公

明時無日不從容三月清遊在醉中晚岫遠當雲際碧
野花爭近馬前紅雖非奉使河源上猶及題詩浙水東
甚覺淹留煩從者覩顏何以荅諸公

送馬編修還明州

當年文采動京城盡說江南馬長卿
青史可憐成絕筆白頭相見重關情
內湖柳色春仍好小院斜陽晚更明
門外畫船堪載酒玉盃儘向故人傾

題張叔芳參謀南澗草堂

狂客構堂南澗濱澗中濯足任魚噴
日容二仲共三徑家與萬松為四鄰
石角鉤衣歸騎晚花枝妨帽小園春
此來不敢歌叢桂知是淮王座上人

歲除日同廖如川至太尉丞相府留坐說周易因
賜酒并官歷賦此上謝

歲晚謬為趨府客深慚款接異他人說經每笑匡君老
賜酒何容畢卓真明日千官瞻魏闕幾時萬國共陽春
家鄉似覺無歸處難擬酬恩致此身

贈太史子玄還閩中子玄侍其師貢秘卿由海道
遂赴京師至浙西秘卿死

險阻蛟龍又則那只緣有路接天河少年謾動乘桴興

中道俄聞曳杖歌
司馬北游空歲月
杜陵歸夢隔山河
憑君莫下窮途淚
何處深山無薜蘿

右丞周伯溫出示前為宣文閣授經郎代祀孔子廟次韻

萬世斯文有耿光
端然龍袞閤宮牆
春秋不獨尊周室
金石如聞奏廟堂
碑樹丹楹皇帝詔
盒封黃帕內庭香
至今仰賴遺經在
師表前王惠後王

送徐大章建寧路學教授

經籍傳家二百年河汾今在路西偏文雄虎豹豈徒作
名動京師非偶然教領七閩勝作郡受知八座合稱賢
佇看召入承明署禮樂遺書在簡編

寄我軒為唐主敬貢士賦

人世有生皆我寄看來造物亦兒戲身為蝴蝶何關夢
飯熟黃粱自有時形影不煩相贈答死生同是一希夷
濁醪到手能成醉此趣陶潛或可知

送貢師泰尚書入閩發鹽糧供北軍

尚書奉詔趨閩省天子深為餉運憂使者頻來大明殿
親軍猶駐武安州浮烟壓地朝添竈明月籠沙夜唱籌
驛路海棠迎馬首春光難為使君留

送杜時中副使

南方風土要相宜小盒檳榔好自隨
蠻戶負魚朝入市
因娘把燭夜題詩三年舊俗猶前日
八郡良家異昔時
若問蒼生蘓息否使車除是一驅馳

夜潮

禁得錢塘江上潮惱人偏在可憐宵頭顱如許更能白
魂魄幾何仍欲消濁浪漸高河影沒雄風未盡雪山遙
西流力盡還東下月滿空江共寂寥

自遣

每每樽前惜歲華牡丹開後似無花山中謾說秦為晉
海上難逢棗似瓜妄想既空無得夢神仙所至即為家
不須更問升沉事看取西樓月又斜

秋閨詞

一曲哀箏感素秋
梧桐落盡碧溪頭
御溝葉上誰題怨
錦字機中自織愁
紈扇恩情空望望
鯉魚書信更悠悠
雙星不到銀河近
風浪遙於隔十洲

無題

及時無物不悵悵
燕語鶯啼總斷腸
洛浦輕塵憐故步
揚州舊夢惜餘香
玉和懶髓寧無藥
絃續鸞膠信有方
便把漢江都作酒
飲時猶恐負春光

辨謗詩宣徽院司議李榮貴以使事至明州飛語

獲謗拘留二年乞詩白其事司徒方公命還京師
司議因乘海上槎河源歸路未應賒市中徒爾疑成虎
杯內何曾影似蛇官事吉凶占鵲語閨房消息卜燈花
南風乞得樓船便六月中旬便到家

縱飲

外湖裏湖花正開風情滿意看花來白銀大甕貯名酒
翠羽小姬歌落梅身外功名真土苴古來賢聖盡塵埃
韶光如此不一醉百歲好懷能幾回

松筠軒為湖州沈叔方賦

軒居好在松筠裏門外清溪繞屋廬
文物曾陪諸老後故家似是百年餘
客來與酌茯苓酒月出共看科斗書
若見漁郎煩借問桃花清思近何如

謝吳起宗寫神

紫綬空慚老病身每於時事與經綸
不呼賀監為狂客却謂張良如婦人
潦倒形容何用似荒唐言語半非真
凌烟畫像今誰在更與丹青寫此神

送劉庸道侍老父入閩就養

此別為生一愴然福州遠在海南邊白頭病叟年八十
紅樹寒山路幾千負米既供為子職賃車不仰故人錢
起居莫與檳榔遠風土他鄉氣候偏

棲霞嶺訪姚子章

買得湖船為訪君望中都是北山雲風前楊柳驚秋晚
波面芰荷愁日曛青史縱能傳後世白頭休更說從軍
棲霞有酒能留客縱飲何妨到夜分

送張伯雅架閣入閩省

聞道連年瘴氣收，城中風氣稱清遊。
參天榕樹快人意，似雪梅花當馬頭。
海客朝盤送玳柱，圉娘春咏寫銀鈎。
毋嫌習俗閩中利，儘勝吳船唱莫愁。

題貫酸齋蘆花被詩後

學士才名半滑稽，滄浪歌裏得新知。
靜思金馬門前直，那似蘆花被底時。
夢與朝雲行處近，醉從江月到來遲。
風流滿紙龍蛇字，傳遍梁山是此詩。

劉生侍貢尚書入閩卒業

藉甚劉生尚古文師資貢禹卒業前聞從公未覺山程遠
到日須知土俗分紅嚼檳榔霞滿口白飛鸚鵡雪成羣
七閩自昔稱文物莫說三山盡瘴雲

感事

雨過湖樓作晚寒此心時暫酒邊寬杞人惟恐青天墜
精衛難期碧海乾鴻雁信從天上過山河影在月中看
洛陽橋上聞鶉處誰識當時獨倚闌

老至翻遭世慮牽何曾一覺得安眠家鄉尚遠潯陽郡
世事猶如天寶年朝服唯瞻遼海上羽書不斷省門前
長星正在天西北白水寒沙盡可憐

雨香堂為晦岡李介夫賦

雷電冥冥起晦岡百年靈氣會斯堂友人李愿在盤谷
高士嚴陵是故鄉薄有資囊供一老盡將文采付諸郎
酒坊新斫松杉架每日風來雨氣香

題桃源州知州李尚志母暨陽縣君蔣氏墓誌後

承旨學士榮祿大
夫晉寧張翥撰

小龍岡上有高墳石表新題蔣院君五品官榮清代爵
一封誥織紫鸞文生免何愧孫征虜作誌可無揚子雲
歸去帛焚人事畢大夫原是舊將軍

題原善張府史具慶堂

張子構堂題具慶此生捧檄為榮親府中年少固可數
幕下英才惟此人尚襲錦衣加吉服忘憂萱草共陽春
移忠錫類從茲起何患風雲不要津

題推官贈行卷

聖主搜賢及海隅，王褒歛起應時須。
澧蘭處處歌公子，楚國人人頌大夫。
藉甚姓名登制命，沛然霖雨下雲衢。
力田孝悌興巖穴，何異福王遺畫圖。

西湖漫興

玉局當年為寫真，西施宜笑復宜顰。
朝雲暮雨空前夢，桃葉柳枝如故人。
露電光陰千劫外，魚龍波浪一番新。
傷心最是林逋宅，半畝殘梅共晚春。

清樾隱居

門向東吳好處開
柳花風裏白鷗來
青山對榻容欹枕
黃鳥啼春索舉杯
賓客偶攜紅袖至
庖厨新得素鱗回
滿前清樾誰能領
消得曹公八斗才

贈仙都生

括蒼仙都十二城中有異人
毛骨清凌風振佩
片霞舉
乘月吹笙雙鳳鳴
山上羊眠知石化
洞中桃熟驗丹成
長鑱采藥或能見
不識此生真姓名

聽雪軒

化機潛運本無聲學士情多睡未成
隱几欲同蟬殼蛻開門惟恐鶴巢傾
花飛翠袖寒光動茶煮銀瓶夜氣清
小閣下簾人似玉舞衣製得五銖輕

慧具庵自灤京回

慧師新自上京回壞色袈裟染劫灰
河漢路遥難載石蓬萊水淺不勝杯
已知道骨鶴同瘦無復機心鷗可猜
去把西江都吸盡却從馬祖問如來

仙姑泉次劉郎中韻

誰把丹崖手擘開，巨靈還向此中來。
青冥風露銀河近，白日雷霆碣石催。
神女有時成暮雨，胡麻何處是天台。
劉郎舊不通仙籍，能得題詩在紫苔。

浙江省理問朱文選為冀院君求輓詩

鏡鸞莫更惜孤騫，白玉臺前已抱孫。
冀院君今題鳳詔，婦人貴已載魚軒。
何須出涕悲同穴，政可長歌為鼓盆。
夫婿白頭無所憾，只求文采賦招魂。

湖山堂觀牡丹

穠香偏惹官遊人銀甕連車載酒頻
乍雨乍晴三月節傾城傾國一年春
却勝飛燕為皇后謾把驚鴻比洛神
若問風流誰可賦只應宋玉是東鄰

和三脚雞士壁上韻

河上仙翁有洞房几蓬雖小勝舟航
徑花妨帽青霞近檻竹侵衣白露香
盤內釣魚供過客牀頭剪月照抄方
平生養得雞三脚幾向人間唱曉光

素君詩為山陰王思敬賦

養素衡門歲已深坐看喬木幾成陰青雲不到幽人夢
白髮能知閱世心負郭無田遺稚子傳家有集是黃金
絳霞盈頰先生醉詠徧堯夫擊壤吟

送宋倬還南康

及此青春還故鄉順風幾日到南康峰連五老出空闊
水接二孤來渺茫徐福樓船能共載劉安雞犬亦相將
山桃子落都成樹花裏應迷舊草堂

荅仁一初禪師次韻

富春江頭風浪稀富春山裏薜蘿垂
滿前明月為誰好
中有高僧勞我思
意適定同魚躍處
神清都在鶴鳴時
仰承山偈難酬荅
不是張衡嬾賦詩

過峽石山張同知墓上作

平生好友說張侯
紫峽雲深暮木稠
朱紱尚能光世澤
黃金元不為孫謀
衣冠南郡成前輩
風月西湖總舊游
過此豈勝存歿感
恨無孤劒挂山頭

題若水臨周昉畫用虞先生韻

一片行雲出畫簷東風吹恨滿眉尖
凌波鵲峙塵生步舞鏡鸞迴月照奩
楊柳綠肥羞嬾娜櫻桃紅熟妬香甜
風流更有驚人處呼下丹青語未淹

贈王法師祈雨感應

名銜知久達天關可是風雷指顧間
禹步祝香纔一息雷聲送雨已千山
公私盡有倉箱望隴畝都忘稼穡艱
下土不知蒙帝力滿城簫鼓送龍還

蘭窓圖為戴掾賦

舊家文獻石屏翁
楚國高情世所工
捐佩憶曾過澧上
浩歌今望在雲中
色欺翡翠滋清露
香澹薔薇送好風
可是郎君玉窓裏
肯將幽興出蘭叢

謾興

浮世浮名一羽輕
百年何用校衰榮
滿壺好酒供春酌
幾尺遊絲共晚晴
明月半遮盧女扇
飛鴻斜引謝家寧
揚州杜牧無拘束
每到花時最有情

送戴檢校入閩

叨忝明時已自分，往還惟是舊斯文。
西窓夜雨同聽處，左掖官曹獨有君。
茉莉御香騰玉氣，荔枝顏色染羅紋。
風流東閣應多咏，肯與幽蘭寄暮雲。

雙清館

蔡參政
立名

廬陵兩生來作掾，薤薨長年冰雪寒。
中書八座共相許，華袞一字誠為難。
丰神左右映白壁，文彩上下翔青鸞。
况聞客館更清爽，秋色南山相對看。

送湯僉書還京

天上城開白玉京
仙曹列職侍金庭
行人半是從龍氣
載筆都憑躡鳳翎
鵲西飛雲渺渺
蓬萊東望海冥冥
道家自古無離別
唯誦空歌送使星

園隱為方員外賦

省郎別業苕溪上
抱甕日遊溪水邊
花徑春晴蝴蝶到
菜畦雨過桔槔懸
兒童慣識題詩客
鷗鳥常隨載酒船
更說陳琳工筆札
獨將文采從戎旃

估客

不用誇雄蓋世勲
不須考證六經文
孰為詩史杜工部
誰是玄經揚子雲
馬上牛頭高一尺
酒邊豪氣壓三軍
鹽錢買得娼樓宿
鴉鵲鴛鴦醉莫分

題前赤壁賦圖

黃州故事今何在
漢水東流尚未窮
一世英雄爭赤壁
百年風月屬坡翁
吹簫俊發龍吟後
作賦才豪鶴夢中
二客從遊雪堂夜
丹青猶與昔時同

題曹伯起雲門山房

相國傳來幾世孫
山堂隨處見雲門
侯家畫戟固無有
舊物青氍俱尚存
清譽在人瑚璉器
高情終日鳳凰羣
芝蘭玉樹階庭秀
已是新承雨露恩

送布政司周照磨赴京聽除

沿檄回京喜可知
青雲毋謂著鞭遲
供為臣職乃常事
簡在帝心惟所司
宗廟豈遺瑚璉器
羽儀當會鳳凰池
仙郎戀闕情應切
不為河梁住少時

忠養堂為張府掾賦

張氏構堂情已著毛生捧檄事方新
府中才俊固多士幕下孝廉惟此人
返哺老烏憐白首宜男芳草擅青春
莫論日用三牲養一面歡顏足奉親

筠窓圖為荆南曹以章賦豫章徐文珍畫

此君何可一日無徐君為繪筠窓圖
深居碧雲憐日暮展卷清風生座隅
漆簡舊來銷翡翠漁竿釣罷拂珊瑚
荆南不近周王獵晚節猶能宿鳳雛

秋水軒為惟真賦

鏡湖一曲越城邊
溢岸秋波若可憐
雲點荷塘看鷺下
煙銷沙渚見鷗眠
賦成騎省從斑鬢
酒在稽山信畫船
何在望洋奔海若
軒中自足管流年

題大隱菴開士殊無別遠翠樓

坐來未覺西山遠
紫翠千重隔畫闌
此地豈容攜酒到
任誰只許捲簾看
佛爐香共朝雲散
客碗茶分雪乳寒
一自得陪清論後
此心不用倩師安

金匱山房集 卷三
醉漁為錢思復賦

江湖猶自有狂夫，白髮蕭然負壯圖。
睡著任船隨月走，醉歸臨水索花扶。
要知呂望真漁者，可惜酈生非酒徒。
澤畔獨醒誠可詠，春風能到雪肌膚。

次韻處士和堽上人詩

每到爐頭憶懶殘，十年戎馬雪窓寒。
亂來亦謂功名易，老去纔知世路難。
醉把茱萸應自感，狂題鸚鵡欲誰看。
相逢白髮秋風裏，何惜銀燈照夜闌。

司馬溫公九世孫礩持公自書獨樂園記并東坡
詩刻今將二百餘年紙不盈尺手澤猶存感而賦

詩

浮雲聚散豈堪論富貴何如道德尊幾見蓬萊成淺水
可堪風雨換高門紙圖價匪千金重手澤傳能九世存
眼見寢園成茂草却知司馬有兒孫

留別寶林同別峰講主

酒船漫爾到山陰賴有高僧在寶林不信孤鸞臨寶鏡

更無流水入瑤琴
閒吟蝴蝶過鄰近
醉擊珊瑚坐竹深
此去浙江纔百里
興來命駕即相尋

留題滴翠軒

城中買地論黃金
種得琅玕欲千尺
月臨閒砌白烟生
霧入空林翠光滴
長房騎杖龍一枝
子晉吹笙鳳雙翼
曾過門外迴酒船
洞庭水深楚山碧

贈李學究

裒然縫掖更垂紳
見客何曾有怒嗔
講道誰為木鐸者

摘詞真似玉堂人
舊書幾帙俱先集
修竹千竿是比鄰
每向百花時節到
長裾自曳小園春

重陽日寄洞霄宮賈道士

天官侍郎曾寄音
因循秋晚始相尋
張良中歲頗好道
賈島一生成苦吟
敢學游山隨猛虎
要聽搗藥試微禽
丹泉況說紅如酒
好與茱萸一處斟

田園居

早歲歸田古所稀
豈同蘧瑗晚知非
臘醅儘醉鸕鷀杓

春服仍如薜荔衣一畝園居皆樂土百年富貴儘危機
沙頭幾動鱸魚興每到花時與願違

明州俛師園觀猿

捷於風雨過喬枝乍鎖名園亦自疑幾萬里來都是恨
第三聲後最堪悲月沉夜澗魂先去露滴春梢淚對垂
富貴豈能長汝役綠珠還有墮樓時

晚歸

左掖歸時日未斜小園檢點舊生涯染裙萱草纔抽葉

破雪櫻桃又著花
玉斚試斟官給酒
銀煎重淪貢餘茶
西湖水色春來好
說道風光似謝家

雲溪船為李勛賦

玉山自倒雪溪船
何似長安酒肆眠
良夜竹聲偏到耳
舊時月色不論錢
佳兒出見詩能誦
好客來頻榻懶懸
更有落梅歌小妾
儘堪陶寫盡餘年

徑山興聖萬歲禪寺之廣福庵乃曇芳忠公道場
其徒統上人居馬菴前舊有海棠樹洪武三年結

實大如木瓜五色有香

常謂海棠春一夢却成因果結天葩有同仙客誇桃實
不待詩人賦木瓜龍領珠今歸汝手錦衣囊合在誰家
明年燕子來時候更與維摩作散花

鄰園海棠

自家池館久荒涼却過鄰園看海棠日色未嫣紅錦被
露華猶濕紫羅囊掌中飛燕還能舞夢裏朝雲自有香
銀燭莫辭深夜照幾多佳麗負春光

題王維賢東里草堂

週遭多是及肩牆
馬過猶知舊草堂
苔徑雨晴蝴蝶亂
藥闌風暖牡丹香
篇詩未覺為時重
杯酒能留共日長
豈是輞川無作者
却同裴迪賦山莊

慕雲庵

此菴長與此雲期
大孝終身有慕之
柘櫓更無重飲日
板輿安有再乘時
行天雨絕皆為淚
落日烏啼總是悲
誰刻會稽山下石
悠悠千載白雲詞

題秋江送別圖

故人寫出陽關意都付丹青半幅中
霄漢正當鳴鳳日帆檣好趁大鵬風
酒斟鸚鵡偏能綠花贈芙蓉可奈紅
對此題詩無所屬百年補報是深衷

寄戴山人

近水齋房自掩扉若耶溪路客來稀
沉浮里閨時將隱俯仰人生事已非
小妾謾歌楊柳曲高年渾稱薜蘿衣
誰能富與封君等千畝湖田紫芋肥

醉題

二月鶯聲最好聽
風光終日在湖亭
清宵酒壓楊花夢
細雨燈深孔雀屏
情在綢繆歌白苧
心同慷慨贈青萍
方平自得麻姑信
從此人間見客星

贈朝元宮道士邢本初

朝元宮中邢道士
神采照人如玉壺
中日月付談笑
天上風雲從往還
虎守杏林丹已熟
龍眠秋水劍長閒
共傳紫氣如車蓋
往往相隨出近關

觀雪

銀燭高烧錦瑟停酒杯如對六花傾清寒未覺貂裘重
小舞偏憐翠袖輕金谷綠珠紛有態鴻門玉斗碎無聲
九天散漫隨風處莫是天人歎唾成

筠深軒

幽居只在平湖上萬竹冥冥不可尋龍化每因風雨過
鳳巢都在碧雲深人皆到此失炎暑風忽過之如瑟琴
能有此君相晤對故家何必積黃金

晏居有懷徐一夔教授

逝者如斯繼者誰遺經獨抱可深悲
心忘爵祿身方逸
道載文章老始知
乳燕試飛華屋靜
桐陰初合畫簾垂
古音最愛朱絃瑟
彈向高堂念別離

題孝義詩卷

可將言行以書紳
淮海維揚見若人
慷慨分金存乃叔
艱難返骨葬其親
刺詩杖杜於今廢
高塚麒麟自此新
俯仰即今無愧怍
平生張掾厚彝倫

補賦征雲南掾史凱還詩

大侯秉鉞行天討戎幕論兵職匪輕勢若摧枯狂虜滅
丈無加點捷書成日隨赤舄紆高步身附青雲致盛名
入奏定功應賜爵班超元是魯書生

水竹居為諸葛伯安賦

諸葛南陽有草廬何如於越此幽居門前修竹畫不就
湖上好山青有餘日暮碧雲生悵望天寒翠袖若愁予
鯉魚遺我平安信盡向琅玕節下書

七夕

七夕佳期自古今
雙星有爛夜沉沉
可憐乞巧樓前月
曾照長生殿裏心
鵲引凡情瞻繡戶
蝶隨秋夢入羅衾
斜河已沒東方白
露濕幽蘭思不禁

題徐浦墓銘後肯堂處士吾故人常過其家今其
子溫以戴良墓銘見示愴然有作

百年人事漫紛紛
覺却南柯夢自分
名節不虧惟獨行
墓碑無愧是斯文
器中瑚璉非虛譽
天上麒麟竟失羣

高義有誰如季札願同留劍挂徐墳

送都司邵德章之京師

還記樽前會往年又看沿檄上朝天青雲自此而升矣
白首何堪為黯然劍佩東華深雨露文章西府盛才賢
鳳凰池上應多暇為賦停雲慰老顛

張旭也

題岳王祠

落日西湖土一墟黃泉赤血恨難除開邊衆許儕韓信
舉國渾憐喪子胥廊廟錦文忘版籍京師黔首望鑒輿

即今五夜梅花角吹作南來問信書

過湖山堂舊基見杏花

飲賜黃封未幾時丹青池館盡荒基何人富貴可長在
自古衰榮更共之樂事恰如春夢覺狂情惟有杏花知
醉翁莫說當時醉團扇題詩忘與誰

紫薇樓感事

太尉當年宴此樓長繩直欲繫清秋隔欄畫舫是湖水
捲幔青山見越州疊鼓夜催諸將舞高燈春照美人愁

大夫司馬今頭白不獨登臨感舊游

自貽

近年頗覺志倥侗不復行雲入夢中
聽曲任教絃有悞賦詩何必句能工
豈惟走卒知司馬還有滁人識醉翁
樊素小蠻俱未遣幾曾虛度百花風

東林

之子青年獨老成布袍寬博稱其名
李膺謾自知文舉楊意無能薦長卿
每到草堂成酩酊偶過花徑亦逢迎

卜鄰自覺頭加白轉信前賢畏後生

虎丘寺留題

莓苔欲徧盤陀石知是梁朝古道場
陳迹謾驚成俯仰空門元不與興亡
白漫天上俱兵氣赤伏池中是劍光
如會生公重說法勸教東海莫栽桑

送張丞之湯陰

試官知在兩河間此別車轅未可攀
萬樹秋風古臺路數峰晴雪太行山
甕頭黃酒封春色葉底紅梨染醉顏

儘解腰纏供一醉揚州誰見鶴飛還

山中夏日

禍福無門祇自尋始知明哲願山林誰能白首儒衣敝
吟對黃鸝夏木深賴有故書堪寓目已無官事可嬰心
涼風滿扇清樽在只此人生直萬金

錄家人語

鏡裏霜毛已上顛五千言以退為先到家訪舊俱為鬼
有地投閒即是仙夜雨滿樽儀狄酒春風小幅薛濤牋

謝家諸婢猶前日八翼無煩更夢天

感事

憶昔銀燈鼓瑟琴屏開孔雀畫堂深
頭顱謾有新添雪囊索都無舊賜金
好夢未成春漏盡殘星猶在曉河沉
郎君自上班駢後露滿銅盤淚不禁

題蕪西坡編修自撰墓誌後

笑傲中吳豈問津風流自擬雪堂人
白頭已了浮生事黃土真埋不死身
江上鶴飛前日夢門前花散去年春

漢家政爾論封禪知有遺書獻紫宸

鷓鴣籠

軒然羽翼更何之每見雲霄憶舊時
鳴候露華生玉樹舞憐雪影散瑤池
垂頭就食誠何報側目隨人祇自悲
恩重主家看養別不教鵝鴨混堦墀

囊琴

鍾期何在鑄黃金膠漆相投日以深
妙製偶經雷氏手虛名已說蔡家琴
千年流水高山趣一旦離鸞別鶴吟
塵

滿敝絃雖未試不彈還自有知音

京城得家書題示兒子同同

蕪郎不是飲中仙只好長齋繡佛前
蝶到枕邊身是夢花隨春去日如年
芙蓉別館還依舊鸚鵡小窓殊可憐
縱得歸來城郭在銅駝露冷濕荒烟

寄松江楊維禎儒司

畫蛇飲酒合誰先塵土東華四十年
海上豈無詩可和雲間還有事相牽
牡丹開後春無力燕子歸來事可憐

欲倩鐵龍吹一曲滿湖風浪又迴船

夢梅花處為董師程賦

江南枕上見梅花一片寒光接素霞
蝶化夢魂雲縹緲香生肝肺雪槎枒
乃知姑射仙人宅即是林逋處士家
白玉堂深簾幙靜畫成疎影在窓紗

中酒

連日醉頭扶不起記曾有說酒能醫
知傷肺氣終為患不典春衣亦是癡
小閣留僧看闌茗矮牀對雨教彈棋

餘年有甚唐人癖稍得閒情便賦詩

寄紹州知府金鑑

自君領郡韶州去鴻雁天涯兩送秋
盛氣不題鸚鵡賦高懷應倚仲宣樓
塞予滯跡猶江海之子勞形欲白頭
鍾乳囊封能遠寄暮年此外更何求

碧筩飲次胡丞韻

小刺攢攢綠滿莖看揅羅袖護輕盈
分司御史心先醉多病相如渴又生
銀浦流雲雖有態銅盤清露寂無聲

當年欲博千金笑故作風荷帶雨傾

花外風來香滿湖折荷舉酒笑相呼
自來四明有狂客除却高陽非酒徒
飲處有情絲不斷折時多刺手難扶
豪家玉斗雖云貴有此尊前風致無

送丁道士還澧陵

丁令還家骨已仙更無城郭有山川
未添白髮三千丈又見銅駝五百年
荒草茫茫連故國孤雲冉冉下寥天
澧蘭歌送潺湲水極望涔陽思惘然

題古禪上人房

一染曇花百念空
淨香吹遍古禪風
鈎簾燕雨時時過
洗鉢魚波處處通
雞有佛緣曾聽法
檜因寶界漸成龍
三生誰識蘓居士
惟是鹽官北寺鐘

寄孟昉郎中

孟子能文自老成
早於國語亦留情
省中醉墨題猶在
闕下新知誰與行
紈扇晚涼詩自寫
翠鬟情重酒同傾
接輿莫更閒歌鳳
只可佯狂了此生

寄周昉處士

為爾停驂幾叩門，每於清事得相論。
山中載酒梅花過，湖上放船春水渾。
閑到竹齋為解帶，坐深苔徑與開樽。
當年醉墨留題處，風雨新添屋漏痕。

題福源編後

福緣山作魏家墳，知是唐朝宰相孫。
石首令前官有考，咸通年內碣猶存。
太湖渺渺連精舍，喬木陰陰拱墓門。
千載凌烟勲業在，可無遺澤及諸昆。

謾遊

甚矣吾衰百念慵
花間時一復支筇
邦人幸爾不予鄙
兒子樂然為我從
載酒有時尋古寺
看雲終日對孤峰
林家湖上都能說
二十餘年老醉翁

月桂堂為集慶講主

佛國山中古道場
月中桂子散天香
一枝得共人如郁
雙井能來客姓黃
誰咏碧雲題樹葉
自收清露染衣裳
南峰不與清光礙
好放餘陰及四方

九日過長安鎮王山人

因過王生忘坐久
堦前花有白雞冠
草堂出酒生新敬
雪壁題詩寄此觀
肯謂陶潛逢九日
却如李白醉長安
老夫偏賞東籬菊
搖落羣芳正耐看

歸隱圖為張別駕賦

難得歸來賦
考槃高情都付畫圖看
可能白首更干祿
縱有黃金難買閒
酒舫載春攜二客
巾車乘醉從雙鬟
陶山地接東西眺
謝傳風流或可攀



可閒老人集卷三

欽定四庫全書

集部

可間老人集卷四

詳校官中書

臣孫衡

中書臣劉源溥覆勘

總校官進士

臣朱鈐

校對官編修

臣

錢世錫

謄錄監生

臣康傑

欽定四庫全書

可閒老人集卷四

明 張昱 撰

宗陽宮次楊仲弘老君臺觀月詩韻

當時諸老宗陽會月與浮雲幾變更
丁令豈知為鶴事道人猶作賣花聲
天溥露色開蟾境秋送商聲入鳳笙
誰信紫薇垣內客今宵又復到蓬瀛

送康穆庵赴福州能仁寺席

佛運興隆此一機尊師何負七條衣講經春殿人天衛
咒鉢夜堂風雨歸花為散來春冉冉柳從攀後思依依
幽蘭荔子南方物籠護函封寄莫稀

病起

花事能消幾夜風櫻桃葉底又深紅豈無金縷湖波上
閒却玉盃春雨中枕上楚雲元是夢鏡中潘髻惜成翁
莫言輕薄揚州事著意題詩也未工

題雲林隱居圖為崔彥暉賦

崔郎志趣在雲林筆底遙岑自淺深
歌枕不忘圖畫事開函又動隱居心
粉痕白白生雲氣黛色沉沉覆樹陰
幽思不教忘夢寐耳邊長似有猿吟

留題費山人舊館

舊館經過不用期掃門常恐鶴來遲
但知重客唯司馬不顧狂言有牧之
秋雨石枰看對奕夜堂銀燭照題詩
佳人底用千金產只此高閒可不知

經鋤齋

誰似談翁樂有餘百年生計祇林廬甫田種熟門前稻
暇日抄成架上書睡起謾憐衰甚矣客來唯問近何如
相過里社尋常事只把柴車當酒車

謝寶林寺別峰法師惠僧履

也知鰻井猶龍井合有交游似二蘇起舞謾憐成短袖
徒行始覺是窮途書從堂上出雙鯉舄向雲中墮匹皂
無復舊時公府步君門望絕沒堦趨

宿郭子振雪洞

月光一色香難分不見丹青藻稅文蝴蝶飛來疑是夢
梅花開後却思君都忘長日將紈扇猶恐餘寒到練裙
宿酒覺來看不厭滿牀秋思白如雲

荅韓介石提舉

偶持尊酒對花傾有客能來道姓名佳句纔探出懷袖
故人知是不公卿平生學劍心都嬾此日歸田計可成
彼此頭顱俱種種題詩那得不關情

冬日白牡丹

律琯催春到牡丹行雲欲墮碧闌干似嫌脂粉能相汙
故逞肌膚獨耐寒雪艷最宜金縷蓋天香合是玉雕盤
趙昌花鳥新馳譽畫作屏風後面看

老圃堂

不謂斯時有此翁無能田畝累其窮異蔬自灌欲百品
老圃官量無十弓草閣曉梳秋髮白玉盃春醉夕陽紅
餘生儘可忘榮辱事與樊遲請學同

鄒將軍輓詩

為臣豈欲國傾危莫把天戈挽落暉一死得埋元氏土
寸心無愧首陽薇安居食祿當時貴守節酬恩此日稀
老我常從大夫後題詩為爾淚沾衣

同貢有初觀潮賦

舊時八月潮生日士女傾城出看潮秋唾似從天上落
晴歡宜向酒中消氣爭鳥道為森爽勢合龍宮亦動搖
今度可憐成獨往海門斜日共蕭條

自賦

高陽酒徒今老生
早年擊筑和秦聲
許人不負一諾重
買笑惟恐千金輕
花間駿馬銅鑄出
枕上愛姬雲化成
誰信青門種瓜者
自梳白髮向秋晴

僧惠炬有悼黃潛太史偈次韻

保叔塔

日鼓西沉逝水東
他生還有此生同
蓮花社豈知元亮
茅屋詩曾詠已公
夢幻已空身外蝶
文章猶鏤蠹間蟲
閒情最是山前塔
日夜風鈴語未窮

寫易軒為方以愚賦

不於闕下寫文星天與冥鴻惜羽翎人世誰為雙鬢白
家山自是亂峰青霞分曉色留書几斗轉寒光落研屏
觀象玩辭從寫徧方干何忝舊明經

挈家圖為尤仲斌賦

葛洪挈家赴勾漏何異龐公歸鹿門擔頭何有琴書累
牛背未覺妻兒村千古清名不易得一斛丹砂何足論
大勝齊侯馬千駟令德曾無遺子孫

悼王自牧

貴賤交遊二十年，忍將老淚灑新阡。
蓋棺不必論身後，入室猶如在眼前。
一首詩今為爾惜，數行志在得人編。
錢塘吟士長相望，潘閬林逋孰後先。

思橘軒為悟空叟長老賦

侍書遺墨函封在，思橘名軒示不忘。
往事百年同逝水，斯文一語有餘光。
風流大抵輸前輩，臭味還應是故鄉。
嘉樹未知培植後，只今百果許誰嘗。

遠翠樓為殊無別上人賦

坐來未覺西山遠
紫翠千峰隔畫闌
此處豈容攜酒到
任誰只得捲簾看
雪晴黛拂蛾眉綠
雨過螺堆佛髻寒
分得半樵閒
拄笏牀頭寧復更彈冠

早行

涼風滿棹賀湖邊
越上諸山盡可憐
遠漢片雲承落月
長林尺練曳輕烟
窓間織女燈猶在
井畔啼烏客正眠
何處閒愁隨夢覺
一聲菱唱發前川

次韻周昉

大尊堂上幾曾空客有登門道未窮吟髯肯因愁裏白
舞衫偏愛酒邊紅百年喔喔雞聲月萬事悠悠馬耳風
及此舊游情分在儘將春付笑談中

贈沈生還江州

鄉心正爾怯高樓况復樓中賦遠游客裏登臨俱是感
人間送別不宜秋風前落葉隨車滿日下浮雲共水流
知汝琵琶亭畔去白頭司馬憶江州

贈寓客還瓜州

把酒臨風聽棹聲
河邊官柳綠相迎
幾潮路到瓜州渡
隔岸山連鐵甕城
月色夜留江叟笛
花枝春覆寺樓簷
贈行不用歌楊柳
此日還家足太平

無題

灼灼庭花露未收
樂然雙燕語綢繆
新粉滿面猶看鏡
殘夢關心懶下樓
春到自憐人似玉
困來誰問酒扶頭
狂蹤已作風絲斷
敢怨流年似水流

與白範論詩

白家少傳諸孫在坐語都忘日晷移不用入吳求季札
有如過晉得鍾儀高情欲共遊絲遠倦跡猶嫌過鳥遲
莫道古今風雅異總于衰晚始相知

冬至日次張太守韻

喜色輕黃未上眉且將心事付游絲
嵇康取醉非關酒
杜甫長吟不為詩
一綫日長宮女覺
五方雲應史官知
人間梅柳關春事
次第從教律琯吹

對雨

好是西湖醉後聽打窓驚柳隔堂屏鶯花又送春光老
鳬藻偏涵雨氣腥曲按銀箏何太急杯行玉手不須停
尊前便是巫山夢莫道行雲事未醒

趙松雪畫苔溪清道圖

吳興元是水晶宮樓閣溪山罨畫中酒舫載歌寒食節
舞衫吹徧鯉魚風當時樂事誰能見此日王孫自不同
亭下鷗波如有感行雲猶在玉尊空

寄胡侍御

後市街頭相見稀此翁真是早知機
浮沉里閑陶彭澤
輕易官資白紫微
小妾畫堂楊柳曲
高年白髮薜蘿衣
風流莫負持螯事
越上湖田蠲正肥

次韻張都事

老却樊川杜牧之
風流誰賦柳絲絲
不關請告來歸早
惟恐尋春去較遲
畫舫行時長載酒
粉牆到處即題詩
至今留得狂名在
唯有纖腰弟子知

謝僧惠蒲履

大夫此日可徒行蒲履深煩寄遠情除是高僧求易
得自非巧手織難成春來見客身差健老去看花步覺
輕他日袈裟如過我定須著此出門迎

寄羅博士

莫說文星與酒星已同傖父泣新亭夢中此日頭能白
海內何人眼更青鵲化羽毛猶姓杜鶴歸華表尚名丁
縱然記得前朝事彈向銀箏只自聽

荆溪漁者為義興道士賦

千尺荆溪徹底清水中無復見蛟行要同雲鶴閒踪跡
自放烟波隱姓名濁酒忘形浮世內青山到眼綠蓑輕
醉來放棹回船去撫掌風前詠濯纓

留題徐子方客樓

仙游到處即淹留雖是孤村境却幽松下野雲閒似鶴
門前溪水淺宜舟琅玕夏簟兒能設琥珀春醅婦可謀
連日小樓忘客況放翁凡事頗清修

周元亮夏景安同過壽安堂提舉乃翁墓上作

蓋棺事了若堂封起伏諸山接過龍解劍會曾心自許
脫驂非惡涕無從每分藥餌扶吾老竊誦文章笑道窮
朱紱在身忘宦況前朝猶有古人風

題明心海上人別弟詩後

弟兄天性本同符遠涉能無一慟乎浮世有身真大患
回車無日始窮途秋巢不宿烏衣燕夜屋偏憐白項烏
切莫臨風揮老淚血痕能染紫荊枯

次韻雲鶴生惠紅米詩

相望只在片雲中自昔神交意已通書枉鯉魚烹後素
粒分鸚鵡啄殘紅回車三徑豈無日放棹五湖須便風
知汝有期林處士尚留殘雪待春叢

雨中過蕭山詛上人別院

雨棹茫然出鏡湖客行偏爾畏泥途僧中果得奇男子
我輩真成賤丈夫重席自能為我設大尊不用問人沽
從容暖閣得佳睡此意支郎世有無

送上虞馬訓導赴昌化縣學

遠赴弓旌未潤迂道行何憚路崎嶇橫經不異郡博士
繼粟豈無卿大夫空使飯盤堆苜蓿已將齋帳染芙蓉
馬融家法風流在女樂從今不用呼

寄湯陰張丞

萬古銷沉入望中悠悠往事付征鴻湯陰風俗今何似
鄴下文辭誰最工爭得不教雙鬢白別來屢見小桃紅
貴游年少輕鄉曲不賦停雲寄老翁

無題四首

幾夢郎君引碧幢
微波難與寄沅江
青春每念青絲騎
白日長閒白玉窓
萋萋結房雖有異
鴛鴦織錦不成雙
潮來好是兒家恨
流過門前氣未降

萋萋芳草被江皋
好是王孫去日袍
幾許春魂迷蛺蝶
近來酒量減葡萄
音書已似題黃絹
踪跡何因夢大刀
可惜百花時節到
伯勞燕子不相遭

咫尺香閨步懶移
搔頭誰理玉蟠螭
不聽小管吹銀字
尺數迴文織錦詩
得伴有時惟鬪草
遣懷無日不彈棋

鳴鳩乳燕青春晚謝却繁花幾萬枝

水心亭館迴無隣好與郎君寫洛神不見鯉魚烹後素
空憐蝴蝶夢中身萋萋誰信南園草渺渺予懷北渚春
雲氣長連峰十二此中消息未能真

雪庭為龍華閣康上人賦

請教雪庭誰是雪雪消應始我初心問知達摩來東土
唯有神光在少林清淨觀空三昧見吉祥風軟六花深
半空挂在羚羊角踪跡無因向下尋

與金冕言詩

天然秋水出芙蓉造物何言與用工風雅遺音自鳴鳳
齊梁餘習盡雕蟲性情敦厚思方到句法雍容律始同
沈宋後來俱作者幾何人辨四聲中

桑梓圖為徐復初參政賦

望中烟樹是黃州城統江波總舊游桑梓能忘丘壠念
夔龍分屬廟堂留牛山雲樹依然在魚水家聲尚可求
他日賜環當有勢題詩却寄鳳池頭

寄陳允中僉事

得放還家休便休更無褒貶到春秋景公死日有千駟
晏子相齊惟一裘朱紱既能從爾去黃金不必為孫謀
何人得似歸來鶴見彼纍纍土幾丘

樵雲詩為李文彬參政賦

赤手樵雲直至今此雲已獻九重深萬方允副從龍望
五色長懷捧日心上接爐烟通御氣淡籠宮樹合春陰
自調玉燭歸玄造非霧非烟何處尋

題崔純一處士遺像

處士於今舊勿論通家三世見甥孫鍾情更為何人慟
出涕方驚老眼昏南塢高墳深宿草東牀佳婿見清門
丹青有筆開生面底用名香為返魂

耕樂詩為許起宗大父高士賦

人生不仕即歸田夏屋渠渠良渚邊
僮指計傭將五百牆桑成樹過三千
食前甘旨惟孫子門外軒車總俊賢
隱去更無城府跡鹿門高致後千年

采藥逕為方德遠醫士賦

藥徑香風作陣來日扶長鑿為徘徊綠憐地錦經春在
紅覺山丹冒雨開本草有名俱用識仙巖可采不須栽
尋常踏破蒼苔處多是門生種杏回

送張經歷之叙州

別酒無嫌醉似泥叙州又過洞庭西雲濤浩渺連三峽
井邑凋殘接五溪雪嶺侵天無雁到楓林蔽日有猿啼
憑誰喚醒王褒夢除是陳蒼碧野雞

題奎方舟講師影堂

火風假合作天親垂老空門哭故人
四句偈留辭世法一龕燈照坐禪身
收來舍利藏生玉散到天花照爛銀
銘塔祇應徐博士備知僧行刻堅珉

命酒徵歌送余壻時伯庸酒間賦贈董景明董彥
禎諸親還遂昌

高堂儘意樂今宵未可樽前自寂寥
錦瑟年華青冉冉銀河秋思碧迢迢
紅於燈下看偏好黃向眉間喜未銷

明日早潮隨去棹到家應及鵲成橋

次韻張郎過大明湖詩

湖上荷花五月涼
水心亭館晝收香
狂來借手傳鸚鵡
俊發教人唱鳳凰
零落翠盤風雨後
淒涼歌扇水雲傍
凋殘_閒下休惆悵
看取咸陽與洛陽

題莫景行茅道士棣華碑賦

茅家兄弟學仙遲
不見春風長紫芝
桃熟海山還有日
鶴歸人世更無期
游魂渺渺知何在
荒塚壘壘盡可疑

惟有夕陽如舊日照人來讀棣華碑

寄張來儀徵士

九江人

湖州寓客張徵士珍重風前詠落梅
錦瑟可容彈別調
白頭只合付深杯
安期棗在神人去
曼倩桃空阿母回
看取漢家汾水上年年惟有雁飛來

杏軒為倪伯溫賦

別屋軒窓絢綵霞
董仙曾以杏為家
邦人為種幾多樹
春雨每開千萬花
門外清陰遺世澤
酒邊丹實賞年華

煩君愛惜題詩壁莫遣輕塵上碧紗

琴鶴幽居圖

幽居琴鶴以怡情童子何知預我清羽翼如傳兩階舞
徽絃為和九皋鳴山林在昔多迂士畫史何人有重名
好托丹青留後日莫忘清獻舊家聲

林泉讀書圖

王叔明畫

高情自愛樂林泉華屋藏修度歲年書簡韋編曾幾絕
硯盤鐵造亦磨穿牙籤插架封芸葉銀燭臨窓散蠟烟

黃鶴山樵如得意丹青為作畫圖傳

大雪留飲沈晉卿家

有客相知感嘆頻
白頭似與雪相親
鍾情好語既莫逆
快意深杯忘幾巡
老至欲求餐玉法
病來不厭散花人
從他柳絮因風起
簾幙輕寒不似春

春夢軒為江西按察司書吏張永年贈別

百年妄引幾曾停
看取池塘草又生
蝶戲落花真自適
鶯啼深院欲誰驚
盧郎此去應如願
宋玉從來最有情

一枕好風吹酒覺不愁春夢不分明

戲贈楊維禎儒司常自稱楊夫子故云

懶散情懷是索居非關故草絕交書空謀赤壁一斗酒
不寄雲間雙鯉魚近日西河疑子夏幾時漢武問相如
大章固是雕蟲事請教何人力有餘

題端古堂為陸敏賦

女媧鍊餘五色石藏在端溪成紫霞天遣六丁神琢硯
夢中一夜筆生花品題猶是宣和刻文具今歸陸敏家

金定四庫全書
卷四
未覺曲江居士老尚能記事墨塗鴉

題僧超然林石灘水圖

公事賦詩紀行役超然著筆良苦心
匡廬哀湍走大壑洞庭橘葉辭空林
品題六印文章在流落三朝歲月深
博雅不煩為鑒定人間過目盡知音

題淥統軒

海濱

綿邈人家海上村潮頭過處與開門
遠山對面如小畫淥水繞軒清不渾
天濶烟雲迷去鶴時來風雨起游鯤

槎迴定泊闌干外坐挹雄風倒大尊

次韻吳子立湖州船中詩

一種湖州罨畫船碧波倒浸晚霞天故人總是三生後
風景何如十載前遠樹白雲橫暮嶺淡烟黃菊滿秋
田吳郎似為才情惱費却銀鈎幾幅牋

謝張別駕惠雪牋

承惠薛濤三百幅甚慚何以報瓊瑤開緘只恐為雲去
入手生愁向日消難用侯門裁刺帖祗應仙洞寫雲謠

金匱山房集 卷四
知君解綬初歸隱叢桂辭成未敢招

百丈泉為及以中長老賦

道人手挽銀河水瀉作空山百丈餘當畫大聲喧醉枕
長年倒影浸禪居玉虹挂石看不滅紅葉乘流畫却如
陸羽茶經知此味可能日給到吾廬

題天龍寺叢桂樓

天龍樓閣迴無隣玉斧修成月滿輪受質豈無如都者
觸機還有姓黃人香通三昧惟心印花散諸天盡法身

誰把碧雲題樹葉惠休詩句本清新

芳林農舍為朱孝先賦

投老歸休只此心
渾家農事在芳林
蒲生曲渚魚苗上
蛆泛窪樽酒力深
應候微蟲窠作甕
啼春幽鳥語如琴
眼前物色皆天趣
底用城居積萬金

務勤堂為傷宜之賦

民生在勤則不匱
爾以務勤為此堂
百畝田苗終歲望
一春蠶事舉家忙
課兒雪夜溫書冊
會客花時列酒漿

黃絹下機倉廩實任從懶卧北窓涼

灌園生為潘時雍賦

却惡喧囂遠市廛自耕荒僻浙河邊時非蘓子投書日
髣是潘郎作賦年飯客夜舂鸚鵡粒灌園春引桔槔泉
塌然鼾睡茆茨下榮辱何因到爾前

送趙惟一貢京師會試

過却龍門總是雲凡魚回首盡離羣風雷忽起三層浪
毛骨都成五色文螢火幾憐車角聚桂枝獨許郗詵分

臨軒策試當條對母以虛文負聖君

請復朱娥廟詩

上虞朱回有孝女十歲過於烈丈夫義感皇天存祖母
身輕白刃禦強徒朝廷既已載宋史民德從之厚海隅
事上太常須有議肯教無廟薦潢汙

奉萱堂為陳彥廉

綦履鳴環左右間佳兒佳婦及承歡天回白日臨瑤席
風約紅萱壓畫闌小管注春情婉婉長裙曳翠佩珊珊

孺人貞儉存家訓不使屏帷繡孔鸞

十二月白牡丹為呂經歷賦

章貢瑞金人
前奉禮郎

濠泗蒙恩得放回牡丹猶寄舊亭臺忽驚花向臘前發
却是春從天上來歡動山城傳好語兆徵幕府得良才
靈根自是南方種只合移歸上苑栽

與胡奎言詩

詠歌終日莫予違可與言詩竟日稀風雅不刪真妙製
性情所得是天機盡知金翠塗屏雀未見丹青畫袞衣

杜甫當年評衆作鯨魚碧海敢云非

題白雲文室

空門真足了吾生一到脩然萬慮輕
下榻偶然清話久推窓唯見白雲橫
銀煎淪茗沙彌點宿火添香侍者清
甚媿主僧知我輩碧紗新染待題名

留題天目尊師并題蒼古詩卷

蒼古仰聞君一語當時巖壑頻生春
承恩屢入九重殿出對常先十七人
中使飯傳諸寶器內庭坐賜襟花茵

自天沛澤誠稀遇拜舞還山洗幻塵

元日大雪

東風吹雪逐年新洗盡街頭萬馬塵
桃板謾題新得句椒觴偏醉少年人
江山未覺非前日老大猶憐有此身
稚子老妻能慰藉辛盤聊復賀青春

搜索舊稿有感

抖擻蓬塵紙一窠束之高閣又何多
百年公論竟無定千古文章將奈何
大雅未應終絕響離騷可謂極顛波

仲尼刪後詩三百誰與升堂取瑟歌

癸亥立春在壬戌十二月二十五日

一歲兩春應是閏自題春帖自相憐苟全性命君之賜
痛念文章兒不傳隨俗辛盤惟赤手省思舊物只青氈
土牛雖送餘寒在未可重裘換薄綿

元旦試筆

鳴玉趨朝已不堪白頭早賜老江南從心所欲過八十
屈指可談無二三獻歲屠蘇增甲子發春萱草願宜男

金史卷四
卷四
兒扶拜答鄉人處只誦猶龍惟老聃

金山寺

六鰲捧出法王宮樓閣居然積浪中
門外鷗眠春水碧堂前僧散夕陽紅
揚州城郭高低樹瓜步帆檣上下風
人世幾回江上夢不堪垂老送飛鴻

過周昉草庭有感

深青淺碧自盈盈一片光風共晚晴
意思不殊周茂叔品題何藉鄭康成
郎君東閣詩曾詠蝴蝶南園夢又驚

轍跡到門憐草色白頭扶下小車行

郭將軍妻李氏輓詩

夫能以義殉孤忠家國綱常事則同中閭不踰貞婦節
大家何啻古人風機絲已斷塵燈在木主新題總帳空
博士已銘墳上石九泉深慰若堂封

送徐生還台州

徐氏樓船且莫催當筵有酒更徘徊山留倒景日未晚
雪滿大江潮正來黃葉盡時尋雁蕩丹霞起處望天台

楚人自覺多秋思懷抱今因作賦開

安晚堂

有酒如澠不用謀阿翁只合賦三休鄉閭可杖容稱老
晚節能安自不憂絲竹閒情信陶寫起居惟適是溫柔
百年耆舊今誰在且醉官窰大白甌

飲吳令家

膠漆相投古亦難酒間何事慘無歡苦愁海底量深淺
痛哭燈前出肺肝白首既辭當世事朱絃何必向人彈

醉來渴甚思吞海無復天家小鳳團

舟中寄謝別峯南翁二尊師

為師傾倒盡雙瓶船過柯亭酒始醒
索笑始知高士去題詩猶愛越山青
交情舊雨同新雨世事長亭復短亭
恨是柳遮樓上笛只教向秀隔烟聽

寄馬孝常

時新得妾

好是吳門馬孝常百年俱是夢中忙
謾憑青鳥往相問說道白眉今更長
陽羨故人俱契闊鯨湖歸棹又相將

重來定及先春雨要試陶家雪水香

獻歲旦日同芳谿吳理問訪許處士

月旦泛舟從許劭蓮湖溪水白生烟到門好雨過雲去
說劍雄風生酒邊閒話紫衣成昨夢醉看烏帽惜餘年
懔懔不省臨流別想是行雲扶上船

留別姻家吳子道理問

時側室
失歡

記得湖船醉夜深交情何啻斷黃金通家叙舊猶前日
把臂迎歡共此心秦女鳳簫移別調楚人芳草動微吟

明年不待梧桐雨來聽高堂鼓瑟琴

題韓處士墓銘家譜後

處士本嶧縣竺氏子繼韓為魏公九世孫受業莊節
韓明善先生竺韓俱世姻

處士連姻俱相門學傳莊節道彌尊與編家集文章在
十世宗支譜系存猶喜繼韓能有子尚憐承祭見諸孫
頃原瞑目知無憾手錄清規付後昆

輓崔彥暉母趙夫人

趙文敏公之孫女情忝通家見嫁時環珮盛儀猶內院
波瀾餘澤自天池佳兒裕蠱承先志淑女宜家副夙期
已託文章題琬琰百年墓木照豐碑

初至芳谿

義興

罨畫溪頭雪水渾是誰酒觴過溪村故人見我即握手
步雪看花直到門倉卒傾銀開內閣從容移玉出諸孫
餘生媿忝通家舊委曲交情可盡論

吳子道同兄輩嘗子鵲

張旭何嘗是酒徒深煩為我作春醕酒行天降盤中露
鵝割囊封塞上酥迹遠五湖身既隱醉歸三徑子能扶
南山遠對東籬菊除却陶家別處無

梓軒為湖州曹生賦

當軒雙梓碧沉沉直幹凌空過十尋客到不妨為少憩
風來或可助長吟百年大用充梁棟一日希聲中瑟琴
宜子毋忘角弓賦將期奕世共清陰

同韓介玉過月溪上人玉雪軒

高僧習聽之所在統院竹梧生畫陰此境應居玉堂側
是誰移置雪山深銅瓶薝蔔不自供碧椀醍醐為我斟
老得一閒君所賜小車隨處有山林

次雪鶴生詩韻

詠海上歸俗僧
新安失節婦

北窓晝眠驚叩門詩筒遠寄願所聞太學鄭虔固三絕
小字李潮仍八分湖上好懷非往日枕邊殘夢是行雲
兩年屢有清遊約幾似空言以屬文

雄鳩鳴雁即天涯未覺藍橋去路賒夜枕不迷蝴蝶夢

春衫深染石榴花千鍾縱意伯倫酒七椀清心諫議茶
錯向牆頭窺宋玉風光元在魯東家

贈湖州楊均顯製筆

當年馮陸擅吳興曾許楊生繼盛名三館每蒙諸老重
萬鈞不博一毫輕歸來未覺江湖遠落拓寧知歲月更
穎也此時須自薦國家用爾頌昇平

柘軒詩為教授凌彥肅賦

滿軒桑柘共生成坐愛春風向日榮五畝宅思鄒孟子

百年心慕李延平
葉供蠶事誠何損
衣被民生獨用情
中有如綸絲五色
願從衮職補昇平

武陵嚴子英家世善製筆

嚴應始以筆治生
至今孫子大其名
用世雖云四寶具
傳家貴在一藝精
東郭之貌即毛穎
南山有竹俱管城
器利天下功不有
慎守其業毋自輕

昌化縣學訓導章琛抄錄武林郡志還鄉

唐相郇公尚有孫
不將家世忝斯文
高堂別席事抄錄

小帳停燈校糾紛
脫稿近知將解局
疏麻擬折遺離羣
武陵郡志多奇事
歸對諸生誦所聞

示山中白雲牛

耕田世界絕纖塵
白玉毫光照爛銀
蘆葉膝邊穿得過
天花背上落來勻
狂蹤未定難明性
妄想俱空始見身
驀直絡頭如不錯
也須慚愧執鞭人

過上虞仙姑巖觀瀑布泉作

誰把高崖手劈開
巨靈還到此中來
青冥風露銀河近

金匱石經卷四
白日雷霆碣石摧潭上龍簾薄絳雲廟前馬跡過蒼苔
猶勝漢使經年別載得河邊片石迴

深雪齋為金西白長老賦

道人宴坐維摩室積得天花似雪深明月有輝同大地
白蓮無影到東林抽毫司馬應難賦斷臂神光或可尋
落絮游絲紛滿眼從教門外作春陰

書藥舟為湖州沈玉泉架閣賦

溪上香吹白藕花沈郎舟楫自為家雙鬟蕩漿乘流去

小榼留人易日斜
采得綠荷成野服
博來紅米是丹砂
綵鸞韻寫松烟墨
不與青蛇道士賒

西湖晚春

憶昔東坡為寫真
至今詩句在遊人
朝雲猶是當時夢
桃葉渾非舊日身
鶯燕情懷千語少
魚龍波浪幾回新
傷心誰問林逋宅
零落殘梅共晚春

留峽石朱山人家

桃熟許同朱老喫
却先桃熟為開樽
白魚入饌溪鱗足

紫茁堆盤野味存詩和淵明為我誦酒沽若下勸人溫
迂疎且作須臾樂從者何嫌久候門

海昌雙廟同張太守次壁上題韻

孤城請援待王師保障真成累卵危作厲誓將擒賊去
分羹何惜愛姬為忠臣盡命以報主信史大書無異辭
三十六人同日死獨呼南八作男兒

趙松雪墨蘭

玉廬墨妙世無同九畹高情更所工捐佩昔曾過澧上浩

歌今望在雲中娟娟奕葉承家澤
淡淡幽香媚國風
莫把騷詞煩宋玉
賦成還到楚王宮

松隱軒

誰拜青松作大夫
蒼然離立自迂疎
風聲白日迴幽夢
雲氣長年到隱居
剪葉浸泉春釀酒
截肪點火夜抄書
歲寒齊木俱零落
一杖人間不顧餘

剪韭軒為韓叔賢賦

魏公七世孫

故家不貴味能真
率爾蔬醪自可人
既向畫堂題剪韭

更將玉斗出娛賓青青葉綰指環小白白頭攢乳管勻
還是相門風致在食前誰謂庾郎貧

南坡書室圖為竺郎中題

竺為朱文
公外家

南坡書室未能還一夕情生夢寐間職任握蘭居紫禁
心隨畫筆到青山一經教子今何忝九世為儒古亦難
家集河汾來學盛豈無房杜出朝班

天香室為定水寺復見心長老賦

宋楊誠齋與定水僧璘公有鄉里之好璘以桂作餉

誠齋荅以七言詩刻寺中

雙峰桂樹今無似，說道璘公有後身。
金粟如來能作主，碧山學士願為鄰。
天香入餉清可食，秋露染花黃未勻。
何惜一題方丈室，與師同是豫章人。

送星翁甘碧泉挈家歸彭澤縣

睽離心事正忡忡，執手何能別此翁。
葭莢戰秋江雨白，鷓鴣啼曙嶺霞紅。
貪狼斗柄纔加戌，織女雲車又向東。
我憶陶潛舊鄉里，到家休負菊花叢。

蛟門春色圖為定海王宣使題

風景蛟門春更佳晴來滿海是雲霞鯤鯨已入任公釣
波浪長隨漢使槎天上星辰歸盡省人間歲月屬桃花
仙人自有雙鳬舄弱水蓬萊路未賒

暘谷軒為王知事賦

地入青徐眺望賒雲中鷄犬有人家金烏五夜出暘谷
玉燭萬方瞻日華李泌成仙還作相劉安得道只餐霞
軒前儘種扶桑樹不比玄都觀裏花

寄贊禮郎趙惟一

六年讀禮足艱危知爾朝天副所期宗廟正需瑚璉器
羽儀今集鳳凰池見辭舍館情俱惡憶上河梁步自遲
能慰老人思望切停雲還有寄來詩

靜菴為陳令賦

潘岳賢能邑大夫老成諳練實難如治心有術惟清靜
臨政從公絕毀譽情寄堂琴民自化樂同時物雉隨車
循良在昔多徵拜信史班班不誑予

雪庭上人惠藥資是經錢賦此以謝

北廬居然欲半年甚於水火觀中禪死生有命固無懼
老病他鄉始可憐家食舊非鄰院米藥資今受施僧錢
數間破屋叢書裏誰問洛城盧玉川

問牛軒為海昌北寺訥無言書記賦

犀牛不逐扇俱破奈有人來問此軒資福無端添註脚
石霜何事未忘言大千無迹身俱化一點通明角尚存
拈起家風隨手應莫言無可付兒孫

春草堂為陳生賦

可教遊子不關心
白髮高堂日已深
憂對宜男雖可忘
情同烏鳥若為禁
詩書養志勤三省
甘旨承顏抵萬金
報荅春暉憐寸草
孟郊詩句不堪吟

蓬萊道院

雲近蓬萊蜃氣銷
數峰晴照遠相招
梁間燕子都歸去
觀裏桃花自寂寥
孟飢化人忘戀戀
院牆篴竹謾蕭蕭
雲中何處劉安宅
猶有鷄聲報午朝

演法師惠紙帳

銀燈夜照白紛紛四面光搖白殼文
隔枕不聞巫峽雨繞牀惟走剡溪風
和柳絮何因到月與梅花竟不分
塞北江南風景別却思羶帳舊從軍

題天鏡方丈為能仁淨秋江長老賦

大宗大派接秋江砥柱中流露法幢
照世萬緣俱是妄行天一鏡迴無雙
當家誰道非臨濟說法還須在老龐
驀地繞牀三振錫更無言句兩心降

寄東山寺長老宅區中索畫梅

同是多生無垢身孤芳歲晏轉精神
濡毫應覺香先到寫影無如月最真
庾嶺近來還有信花光以後更何人
情知此事難描畫驛使空回可不嗔

冬青軒為天印上人賦

冬青樹老法王家得與維摩共歲華
枝上蠟封經夏雪堦前雨積過春花
詞人有興從題壁童子何知但煮茶
不下禪牀迎送拙大千同是一袈裟

寄題松風海月方丈為普慈寺林清遠賦

普慈寺主方當年畫省雙鳴赴法筵風過忽聞松上雨
月行不離海中天三生身性何曾改一念聲聞總是緣
先輩往還成故事玉圍曾解寺門前

集雲軒

妙嚴院主斷聲聞密室圓光覆樹雲牀下虎心俱化善
堦前鳥跡自成文池窺片月遺空相樹接諸天散異芬
傳誦六時行道處至今軒戶集氤氲

西疇為陳生賦

負郭有田何所憂
每年春事在西疇
畊回收犢繫牆角
客至呼雞下樹頭
織女機邊祈杼柚
天田星下祝甌窰
幽風七月詩歌罷
土鼓窪樽樂未休

題寶林方丈留別伯舉法師

金相浮圖千級開
雜花如雨在莓苔
要看彈指成樓閣
未許胡僧話劫灰
法器即如廊廟具
寶林自是棟梁材
雖然一片袈裟地
不是兒孫不可來

寄報國寺東堂止菴祥尊師

覓船直欲橫塘去
船去橫塘為訪誰
白首正慙玄度老
碧雲曾與惠休期
山林此日多高士
風雨連牀可論詩
入社既能容載酒
陶潛無復更攢眉

玉岑舊隱為林叔平賦

齋館惝然題玉岑
老生時作越人吟
曰妻曰子留他土
維梓維桑念故林
豈謂青雲天上遠
漫憐白髮鏡中深
古來儒士多遺憾
為此文章竟陸沉

古邨為曹迪賦

宋曹利用
之後人

魏國南來有子孫至今人物古而村松根曲處安琴枕
山石窪中注酒樽汲冢文章遺竹簡秦人風俗尚桃源
海波不接天河水要得仙槎逕造門

思雲圖為羅從事賦

抽毫據爾賦思雲為感羅含以孝聞職任紫垣親不逮
粟支紅腐祿無分終身有慕誰非子此日移忠正在君
郎署丹青稱高步須求名筆記斯文

贈寫神朱大年

筆頭何在覓人知
鏡裏相看不自疑
麟閣盡能圖燕頤
龍沙誰復恨蛾眉
千年名姓毛延壽
一代丹青顧愷之
夢感九重終見召
藝精寧患不逢時

送別唐克讓還家

家山遠在白雲邊
膝下相違又隔年
萬里壯游司馬氏
數函書畫米家船
裁成綵服歡無已
遺却瑤華思惘然
海內故人零落盡
別離多付酒尊前

寄表兄蕭丈索處士

七十餘年親弟兄書來堪喜復堪驚
杯中醕酎無虛日枕上邯鄲過此生
老至音書宜有數別來骨肉若為情
遭逢洪武開新運又十三年見太平

克讓許寄酒詩以趣之

春至遣懷惟恃酒莫教花發酒來遲
文章每與年俱進世事還於老始知
海嶽幾時吟雪夢岑陽有約采蘭期
古音最愛朱絃曲彈到高堂念別離

月軒為張令賦

思親對月清宵坐了却公家事可知白髮已無重見日
清光還有再圓時葉間零露皆成淚窓外栖烏總是悲
大孝終身俱有慕不辭為賦蓼莪詩

寄湯水嚴仲原處士

情忝姻家亦是緣人來無不問湯泉間常采菊東籬下
每望長安西日邊素業魚鹽滄海上綵衣孫子畫堂前
高車況是京畿內受用高年五福全

孝友堂為姚氏彥名彥昌昆弟賦

兩生孝友誰不知左轄題堂固所宜
豈獨聲名從此大要教風俗與之移
棣華煜煜照春日烏鳥啞啞啼樹枝
林植羽棲俱有感過門賓客可無詩

灋東耕者為社友黃成章賦

廡門不道似烏谿榆柳連陰覆大堤
常日墟船潮上下每年春事灋東西
勸農隨例拜車馬觀稼依稀從杖藜
牛角挂書吾道在古來力食盡男兒

寄王元吉楊東叟二處士

華亭猶有古人存，風景依稀似鹿門。
一曲晴湖通畫舫，萬株古木出烏林。
卜鄰王翰俱文物，識字揚雄足酒樽。

有約重來訪東叟，徵歌同樂最閒園。

席帽山人所居

寶古齋

曹昭寶古以名齋，韞櫝非時不一開。
圖畫丹青半人物，尊彝文藻盡雲雷。
流傳竟自何人得，玩賞知經幾手來。
世故浮雲眼前事，題詩投筆為興懷。

雙桂堂為俞子成賦

雙桂團欒對兩楹
碧雲無數共生成
却生片玉曾馳譽
實氏五枝俱向榮
奕葉至今傳世澤
靈根既老際文明
會須滿袖天香裏
載酒高堂說姓名

送廖思誠知安肅縣

新恩領縣之安肅
便道寧家孝使然
親舍戀深雲白白
官程期速馬翩翩
人民社稷上所倚
期考簿書勤是先
政考有成俱大用
到官知爾又春前

聽泉軒為龍井智法師賦

山僧聽得泉聲好，每夜坐忘清夜深。
松上落來驚鶴夢，潭中瀉下雜龍吟。
觀心已淨平生垢，到耳能空見在心。
此去涓流如不息，沛然誰禦海鯨音。

聽律令鄉飲回贈劉復齋馬弘道

晚步河橋念此身，餘生猶幸齒編民。
府城無迹非為賤，松菊猶存未是貧。
官府才聽新降律，酒壚先問有錢人。
衙歌仰詠唐虞化，鄉飲俱前老縉紳。

梅竹軒

古梅修竹兩相親，坐對高堂如大賓。
空谷有人憐翠袖，雒陽無夢染緇塵。
歲寒清白能同趣，日暮平安是此身。
三友若能同此隱，門前楊柳任芳春。

晚出西湖畔會葉舜臣自運司中出

武林耆舊似公稀，未覺文章與世違。
節序去人驚逝水，柳陰當面轉斜暉。
羣鷗晚戲呈天趣，孤鶴宵鳴自道機。
早作餘寒宜晏出，為嫌多露濕荷衣。

悼孔英夫提舉

孔子五十
五代孫

老淚何堪哭寢門斯人况復是斯文六經政爾傳家集
曲阜蒼然掩暮雲鬱鬱澗松看得地昂昂野鶴又離羣
賢郎無忝家聲舊能以文章繼世芬

修淨慈寺成賀簡以道長老

古佛毘耶願海深萬間彈指變黃金分明堯率諸天境
慶讚閻浮施主心堂上鼓鐘聲大地域中龍象盡知音
自應雪夜傳衣處不獨神光在少林

送沈敬止赴胄監

老態頽然厭世氛，喜看賢者步青雲。
事君如得行其志，出對還當罄所聞。
列宿九霄餘氣象，靈芝五采絢人文。
滿朝侍從皆英俊，始是文章可策勛。

鄭竹隱處士墓上作

何慚南渡舊名臣，奕世居然保縉紳。
五福備身宜爾壽，一經教子異他人。
蛟螭鼉黿碑丈古，松柏陰森墓道新。
彈指浮雲今古事，幾家荒草卧麒麟。

宋高宗御題李唐畫唐香山九老二律詩

兩疏誰是見機還終始君臣似此難宸翰昭回雲漢上
衣冠彷彿畫圖間當時諸老琴尊會盡是同朝鴛鴦班
風采拜辭雲陸下白雲千載在香山

中秋望月

甲辰
年賦

月裏分明見九州浮雲西北是瑤樓歌鐘未厭今宵酒
砧杵那禁此夜愁若使有情須痛哭不知何物是風流
霓裳不向當時罷戎馬中原未肯休

學舟為崔檢校賦

髯崔家寓市河頭齋館臨河題學舟不為乘桴浮大海
應期擊楫逝中流風波浮世何能濟駟馬高車更有憂
何事外郎居騎省却將魂夢記滄洲

題燕山萬里圖為江左葛元堯編修子賦

翰林藁葬古幽州萬里游魂土一丘父子有情終自苦
丹青得趣豈知愁風沙日日黃龍塞雨雪年年青海頭
狐死首丘誰不念莫將遺憾在遐陬

送單尚書致仕還鄉

風塵瀕洞識龍顏，便解兵符拜諫間。
天上已扶真主出，榻前尚乞故鄉還。
黃金優老車增重，紫禁朝天夢可閒。
世受淮田知所賜，幾人得似單家山。

題國清寺三隱堂

豐干寒山拾得

莫與閒人說舊遊，這些風采儘風流。
只因當日機曾露，直到而今笑未休。
虎跡已無深院閉，藤花猶蓋兩巖幽。
相逢總是知音者，莫叫蒼天惱趙州。

明巖寺

疊嶂重巖出半天芙蓉幽洞下相連
浮雲富貴二三子放浪人天五百年
飯後風松為伴侶春來花鳥作因緣
村堂野墅俱題徧句句天機合自然

寒巖寺

寒山隱
身處

一片浮雲去不還龍吟虎嘯出人間
豐干往日成饒舌太守當時亦厚顏
秋至候蟲還唧唧春來鳴鳥自關關
烟蘿古洞依然在要問寒山即此山

送郭子程湖州收父骨還廬陵

事親盡禮誰非孝豈願遭逢世道艱千里風塵音問隔
十年父子夢魂間首丘自負終天痛函骨寧期此日還
地下老翁應自慰免將遺憾在他山

同謝別駕過澱山湖登普光寺閣次壁間馬郎中
詩韻

浮雲終日作輕陰寺下龍潭百丈深古刻尚存邢女記
好詩今與謝公吟風行澱水搖深碧雨過松花落細金

怕見南湖春草色每來高閣倦登臨

陪月中丞訪寶林寺別峰尊師有詩因次其韻

傳呼載道不知遙
驄馬乘秋氣益驕
佛運已知當末劫
寺碑猶及見前朝
升堂鐘鼓聞三界
聽法魚龍趣兩朝
不有斯文為世重
東坡何以慕參寥

客至

潦倒無能因不才
樂然笑口有時開
呼猿洞邊采藥到
浴鵲灣頭載酒迴
對客且容談玉麈
題詩何必寄銀臺

金少隱集卷四
甕中聽取春漿熟便買鱸魚煮四腮

題東皐隱居為范思賢賦

海水桑田幾變遷桃花依舊郡城邊
蔬園百畝充官稅藥價一生供酒錢
詩句興來題綵筆道心悟後付朱絃
院曹誰信同僚後談笑交游十五年

留題天台香積寺為鄉僧印秋海賦

花界追尋一榻涼破除煩惱是禪房
慢揮大扇消長日共倒深杯說故鄉
萬事到頭成畫虎百年束手共亡羊

明朝馬首勞瞻望此別人間更渺茫

歸來堂詩為雲間青龍鎮章吉甫太守題

時年七旬

使君致仕歸來日九十慈親猶在堂秋水鱸魚朝入饌
薰風紈扇晚生涼孝廉早已稱高士名德今宜重一鄉
花底板輿喧笑語白鬚風動綵衣裳

送雋侍者還永樂寺闡大猷尊師

記乘官舫過明州永樂寺中曾一遊繞逕涼雲修竹曉
滿池香露小荷秋松花酒貯山瓶送雀舌茶煩弱籠收

爾雋到家煩問詢舊題還刻在詩樓

黃岡寺贈朱質夫

貢尚書門生

尚書賓客唯予在門下諸生獨爾存終有黃鍾求賈鐸
肯於清廟少犧尊茶瓜留客岡頭寺風雨題詩海上村
莫問幾時回馬首也須迎候出衡門

環隱有序

龍翔宮實宋理宗潛邸有十齋環隱其一也後賜為
道觀高士毛起宗居環隱就以自號瞻仰畫像賦詩

一首

大化循環不可窮至哉樞始得環中漆園化蝶有今日
柱史猶龍非此翁齋館前朝存舊制丹青遺像仰高
風百年文獻凋零盡川上空嗟逝水東

夢梅花處

帳底梅花覺有香不由鐵石作肝腸宮妝何處紅綃女
春色誰家白玉堂枕上翠禽樓正穩夢中蝴蝶引初長
城樓畫角復吹覺任有文章惱宋郎

看劍亭為曹將軍賦

此劍名家已數傳為曾與國爭風烟聞雞起舞非今日
對酒閒看憶往年三尺神光遺電影一函寶氣閔星躔
章江日夜東流去亭下題詩重惘然

紙被

閒眠受用剡藤香不比行雲惱宋郎月裏楊花終夜落
雲中蝴蝶過春狂象牀繡枕知難稱道館僧房或可當
還是夢中風景別東華塵土久相忘

贈醫士潘氏中和齋

心天一氣貫中和
孺子膏肓若我何
內景金花今證道
上池玉液不生波
獻方龍每乘雲至
妝杏人曾倩虎馱
十世醫傳方脈妙
門前無奈杏花多

寄謝伯昭伯理二昆仲

話別南堂二十年
江湖魚雁兩茫然
車書此日同天下
濠泗而今是日邊
架上遺書宜教子
老來樂事是歸田
謝家子姪應相念
每到池塘憶惠連

過林和靖墓

西湖處士林和靖兩句梅詩直到今此事宜容同末俗
當時還亦有知音高車大旆知何往剩水殘山尚可吟
三尺孤墳埋宿莽過君誰不願抽簪

尚絅齋為洞霄郎可道賦

衣錦能懷尚絅心闔然師道重山林玉因韞櫝知無價
琴到希聲是大音蝶化夢魂高枕後鶴鳴秋水萬山深
青苔黃葉空巖畔俗駕何由得一尋

瓊花

幾枝雪艷向風斜未許吹香上髻鴉誰取根來廣陵郡
却留春在后皇家懿公滅衛雖云鶴煬帝亡隋豈獨花
自是錦帆迷故國恨連芳草滿天涯

寄題清暉樓

謝公履跡徧巖扉似覺高情與世違昔日文章歸麗句
至今山水發清暉神仙滅跡虛金露塵俗何緣別翠微
尚憶詠詩同水部山林有待薜蘿衣

寄梁太醫

髯翁邂逅海西邊
風采何曾異往年
談客過門從取醉
貧家問疾不論錢
送方龍每乘雲去
種杏人曾見虎眠
此等希奇何足怪
古來醫術盡通仙

移居壽安里二仙巷

移居所籍應官期
奈此黃梅五月時
牆竹翻風搖鳳翥
堂萱卧雨帶羅披
夏陰正盛衣還濕
日晷無移事可知
此景自憐張仲蔚
蓬蒿三徑共棲遲

王敬仲知府自臨江回

九鼎勲勞一羽輕
幾何歲月俟河清
盧生覺後惟空枕
丁令歸來祇故城
宛馬老懷沙苑闊
賓鴻春憶塞雲平
天恩既許投閒後
莫向除書問姓名

次韻鄧孟文經歷留別詩

總是邯鄲夢裏身
區區鞍馬九衢塵
賢才俱進惟新命
幕府從交舊日人
天上星辰光覺近
寒巖松栢色還新
從來氣候關時事
鴻雁來賓已過春

幕府深居得所親好看車馬動行塵身歸絳縣將遺老
詩忝河梁別故人行行李往來誰不舊疏林折贈意能新
都城路有襄陵使欲托微波寄洛神

夢梅花處

丹青庭院欲黃昏蝴蝶蘼蘼化夢魂姑射肌膚如處子
兜家消息在重門香薰繡被過殘臘影落畫闌連大尊
可是玉川無覓處窓前春色勝張琨

秋水軒

鏡水當軒景最新
翔鷗棲鷺總比鄰
風驚幃箔螢流扇
露濕闌干月近人
深院暑收聞搗練
前溪波小見垂綸
莫言蕭瑟秋光裏
還見文章賦楚臣

次韻慈利縣王孝廉過洞庭思親之作

洞庭波浪接青天
渺渺帆檣上計船
萬里客程何日盡
一宵江月向人圓
橋題駟馬名先至
風遇鴻毛勢沛然
之子澧蘭歌最好
有人雲夢澤南邊

奉天門早朝次韻

千官趣謁武樓間盡是洪鐘帝鑄顏咫尺天威臨御座
太平風景出朝班握蘭鳳閣舍人貴視草鸞坡學士閒
騎馬共談雙闕下期將萬壽祝南山

次韻偶成

雜然異味出賓盤老覺樽前更有歡清夜可人歌板倦
小樓細雨燭花寒狂情肯為諸公吝酒量方知到處寬
醉後玉山從倒却試將時果擲潘安

程家兄弟合情親霽月光風滿座生樂事笙簫相間發

酒懷江海欲同傾，自憐綠髮朱顏改。
尚覺千金一笑輕。
夜半酒醒孤枕上，不將歸思憶江城。

梅鶴軒

梅福高軒得所親，皎然潔白離風塵。
九舉吟徹雲間鶴，萬玉香先天下春。
門外自應迴俗駕，尊前猶得伴吟身。
綠陰窓戶研朱者，莫是青溪點易人。

讀府教授徐大章為岐陽王客白以中賦西塘八
景詠夜卧有懷不寐

金匱石經卷四
若使蔡邕今日讀應題八字刻西塘大音如奏古琴瑟
衆羽不瞻孤鳳凰百世可傳惟述作一辭難措是文章
老夫為此喜無寐卧誦不知秋夜長

壬戌朔旦試筆

斯文天與樂餘年中有黃金取酒錢絳老又添新甲子
王家惟守舊青氈將春梅蕊茱萸小透雲萱芽翡翠鮮
賓客到門無別話履端相慶畫堂前

題梧桐宮六逸堂

龍化青林水滿溪昔人曾此寄幽棲
高情不負杯中物爛醉何妨日似泥
富貴到頭蕉下廡光陰過眼甕中雞
當時不盡風流興付與山鶯儘意啼

題夢焦軒

道人內視已超然一息薰香徧大千
駭廡始知身似夢覆蕉曾悟佛中禪
袈裟萬朶天花裏世界千重梵網邊
重見毘那峰頂上手開樓閣說因緣

姑蘓懷古

十里河堤踏暖塵老懷忽憶故鄉春泥金孔雀裁歌扇
刻玉麒麟壓舞裯翠袖錦箏邀上客畫船銀燭照歸人
而今白髮東風裏疑是前身與後身

題諸葛孔明

身為中山漢子孫西南別立舊乾坤君才十倍曹丕上
位列三台蜀相尊布陣有圖靈尚在出師遺表恨猶存
休將巾幗羞司馬五丈原頭日已昏

題嚴子陵

赤圖神運復炎劉白水真人憶舊遊一代位尊眠鳳榻
千年名重著羊裘山林孰謂無伊尹廊廟何曾棄許
由惟有富春山下月清光常繞石灘流

題張天爵父通守公張侯之墓

平生好友念張侯紫峽雲深墓木稠赤紱既能承世澤
黃金奚用為孫謀衣冠南郡成前輩風月西湖總舊游
過此豈勝存沒感解鞍一奠古墳頭

附錄

伏承員外先生奉楊公之命函香補陀洛伽山
瑞相示現使節今還輒成長律四章少寓餞忱
南陽廼賢上

瀛洲東望海茫茫紫竹林中殿閣涼夜半潮來紅日上
巖頭雨過白花香褰裳珮玦聯珠網束髻冠纓湧寶光
大士神通天廣博盡將願力固封疆

江左長城有鐵星赤心憂國禱滄溟經翻海藏函猶濕
兵洗天河刃不腥屢出賜金分將帥終圖全壁奉朝廷

幕中司馬才無敵執筆磨崖早勒銘

北史楊津鎮定州威望赫然軍中謠

曰不怕利梁堅城

但怕楊公鐵星

天上張公玉雪妍競傳官府有神仙功名早建平南策

詩句今隨過海船夜汲澄潭瓶貯月曉登磐石珮凌烟

知君喜得禎祥兆一目高懸古樹邊

宋史彌遠禱海上見一目挂樹邊後

果拜相

狎鷗亭上望吳山春水無邊壓畫闌一樹飛花羅幙靜

滿湖明月玉簫寒往時京國交游舊今日江城執馭難

後夜西湖鴻雁過好將書信寄平安

楊維禎次韻楊左丞五府壁詩

皇元正朔承千載天下車書共一家一柱東南擎日月
五城西北夔烟霞寶刀雷煥蒼精傑天馬郭家獅子花
收拾全吳還聖主將軍須用李輕車

席帽山人王逢見貽詩

畫省委蛇退食遲倒衣相見即相知風流不減張京兆
心跡無慚柳士師枕上燕鶯鳴曙日道傍花柳罨游絲

天機人事都觀遍有約山中賸采芝



可閒老人集卷四